

萬有文庫

第二集七百種

王雲五主編

明詩紀事

(三)

陳田輯

商務印書館發行

明詩紀事

(三)

陳田輯

國學基本叢書

明詩紀事卷十一

甲籤

劉崧二十三首

崧初名楚，字子高，泰和人。元末舉於鄉。洪武初，以經明行修舉，授兵部郎中，遷北平按察司副使。坐事輸作京師，尋放歸。徵拜禮部侍郎，署吏部尚書，致仕歸。復徵爲國子司業，有槎翁詩選十二卷，補遺四卷，文集十八卷。

王士禎古詩選，有明一代作者衆多，七言長句，在明初則高季迪、張志道、劉子高爲最，後則李賓之。至何李學杜，厭諸家之坦邁，獨于沈鬱頓挫處用意，雖一變前人，號稱復古，而同源異派，實皆以杜氏爲崑崙墟。

田按子高詩，有鍾陵、五雲、鄧溪、雙溪、鳳山、瑤峯、墨池、東門、珠林、龍灣、北巖、龍門、戊巳，十有三集，合爲槎翁詩選，其自序云：年十六得臨川虞翰林清江范太史詩，誦之晝夜不廢，益求漢魏而下，盛唐以來，號爲大家者，究其意之所在，知成樂必本於衆鈞，故未嘗執一器以求八音之備，調膳必由于庶味，故未嘗設一品以求八珍之全，其不能自巳於言者，譬如幽鳥之鳴春，秋蟲之號寒，可謂究極此事之甘苦。宋潛虛、劉仲修、烏春草作集序，甚致推崇，王弇州、胡元瑞、錢牧齋、朱竹垞亦有論定，余獨賞漁洋七言爲最一語，故此選七言採掇爲多云。

陪陶尚書宋太史夜宿齋宮分韻得萬字

鳴鸞莅陽郊。陪祀服明憲。旗常擁圓壇。幕轡蔽脩甸。天高風泠泠。露白星婉婉。尊彝秩斯舉。簾業權以建。凝神向澄肅。秉德方恪愿。調笙思肄三。振羽將舞萬。張筵盛布設。陳幣昭奠獻。聽漏促晨興。嚴衣戒宵偃。駿奔尚齊遯。慎簡慚傾曼。感孚豈殊徵。恭事式同勸。

田按宋景濂郊禴慶成詩序云。洪武壬子冬十一月辛酉。上出宿齋宮。有司戒見。及期行事。百辟卿事。後先駿奔。既竣事。禮部尚書陶凱。工部尚書黃肅。工部侍郎牛諒。晉府參軍熊鼎。磨勸司令吳雲。兵部郎中劉崧。工部主事周子諒。祕書監丞陶諒。晉府錄事張孟兼。吳府錄事吳從善。咸謂升中于天。國之大典。幸際熙明。與於執豆蓬之列。不可無篇什以紀慶成。昭示萬世。遂以星臨萬戶。勳月榜九霄。多爲韻。各賦詩一章。諸人詩多不傳。惟子高此作。尙在集中。子高又有陪祀方邱應制詩。序云。洪武五年五月十一日戊午夏至。皇帝將有事於北郊。進詣齋宮以居。有旨命召兵部尚書吳琳。禮部主事宋濂。率六部文學之士。與俱來。於是尙書禮部臣陶凱。尙書工部臣黃肅。翰林應奉臣張籌。侍儀使臣俞潛。起居注臣劉季道。蔣子杰。給事中臣宋善。祠部主事臣張孟兼。禮部主事臣孫某。國子學正臣夏閱。學錄臣蕭執。職方郎中臣劉崧。咸趨出齋廬。因命賦殿下柳榆。并荷露詩一首。臣琳等覃思濡翰。以次呈獻。上親覽誦之。品第有差。既而復命中貴人傳旨。令賦詩者。咸往殿後觀梔子花。俾人各賦詩。既成。序進如初。明史蕭執傳。亦紀此事。稱帝閱執詩喜。遍示諸臣。召使前。龍眷傾一時。詩亦不傳。附見其事於此。

採野菜

採野菜。行且顧。野田雨深泥沒路。稚男小女挈筐籠。清晨各向田中去。茫茫四野煙火絕。去年秋旱今年雪。草根凍死無寸青。卻攬枯麥淚流血。水邊蒲荇未作芽。甘齋出泥先放花。長條大葉瘦且老。得似家園

松韭好。枯腸暫滿終易饑。酸苦螫人還自知。採野菜。行且哭。貧家食菜苦不足。寒軍掠人還食肉。

告天鳥

江南有小鳥。羣飛上天入天杪。黃茆嶺頭拾蟲蟻。聲聲告天鳴不了。山前山後春雨晴。啾啾千聲連萬聲。瞥然飛出不可見。失勢一落猶哀鳴。鳳凰南飛顧之笑。何不遠引爲娛嬉。謂爾軀體陋。羽毛無鮮奇。徑寸之菲可以營爾栖。一粒之粟可以充爾饑。胡爲躑躅苦抱憤。奮首上訴鳴聲悲。勸爾勿多言。多言生間危。吻弊吭絕徒爾爲。天門九重深不知。

後掘塚歌

峴岡西北龕村路。近郭家家葬墳墓。富家盡栽松柏林。葬時裝斂帛與金。百年太平人事好。時時子孫來拜掃。祭餘列宴晝亭深。細馬香車入青草。墓門碑石高崢嶸。界水連山誰敢爭。枯枝墮地無人拾。牧豎驅牛下山行。亂兵西來人散走。青野荒荒絕雞狗。邱墳已見遭掘伐。棺槨還聞被椎剖。錦衾繡袂顏色新。玉珥金環光照人。前年幽鬼窖中物。去作誰家富貴春。

養牛歎

田家養牛如養子。愛惜皮毛少鞭箠。一冬霜雪無青草。還餒鹽羹齧糠粃。全家性命繫一牛。牛肥卽喜瘦卽愁。木闌土屋護乾煖。出入更防人夜偷。亂來買牛如買馬。典盡春衣酬買價。寸田尺土未得耕。軍來牽

牛誰敢爭。攔街號哭送牛去。青草空餘舊眠處。君看新來山寨軍。前日亦是耕鋤人。卽今打糧不耕土。身著牛皮食牛脯。

題龔本立所藏燕文貴雲岫圖歌

豫章龔郎好文雅。錦軸牙籤滿書架。示我春雲出岫圖。云是燕公之所畫。高堂慘淡開林邱。青峰赤谷爛不收。長風浩浩起天末。萬壑青雲如水流。松根石頭伏羊虎。松頂垂蘿綠如雨。伊誰濯足望青天。絕似東歸孔巢父。匡廬巫峽相渺綿。三湘七澤俱可憐。冥鴻蕭條洲渚斷。風帆杳杳歸何年。吁嗟燕公真絕筆。好手當時稱第一。殘縑猶帶汴京愁。墨色蒼茫映寒日。城樓六月煙塵黃。我亦看雲懷故鄉。思君如憶圖中景。應過水西尋姥岡。

題邊長文爲黃子邕畫雪舫齋圖

簫峰隱者黃子邕。綠眉秀頰雙青瞳。雪中曾踏溪南石。坐聽簫聲雲霧中。懸崖路轉愁獨往。結屋溪邊小於舫。絕似山陰王子猷。夜半乘流入虛朗。朝歌綠水憐芳春。暮歌黃竹哀時人。長風遠從海上起。劃見六合無纖塵。新城往年兵革起。林杪高軒化荆杞。東湖湖上遇邊郎。爲寫幽居雪山裏。千崖凍合凝夕光。江鳥不飛沙岸長。別浦維舟初罷釣。深簷卷幙更傳觴。簫峰遠在青天外。玉樹簫森澹相對。疑有飛舩駕白虬。飄搖下與羣仙會。仙人一去不可呼。此境欲往愁荒蕪。炎埃六月何由濯。日倚湖陰看畫圖。

題塔郎中畫湘漢秋色圖

兵曹簿領困填委。勿見雲山落塵几。問君何意貌此圖。湘漢瀟瀟秋色裏。長峯巨壑相參差。彷彿江行曾見之。雲中樹色三百里。峽裏猿聲十二時。古人今人不相見。江水依然淨如練。魚鳧窈窕接山川。雲雨荒荒出臺殿。岸迴路轉楓林青。丹崖紺壁秋冥冥。山童出掃澗上葉。客意已到松間亭。登高望眼心獨苦。江闊霜清雁如雨。九天飛瀑下香爐。萬里歸帆到鸚鵡。我從前年來帝京。偶離疏屨峨冠纓。故園耕釣歸未得。對此佳致空含情。茅堂遠在珠林下。安得從君問圖寫。九衢塵動五更風。又趁雞鳴逐朝馬。

寄贈萬德躬時在清江

文章名世自有神。詩家之秀今何人。豫章特達邁先輩。一出已絕江西塵。乾坤悠悠入清曠。歎息斯人欲誰向。清秋鷹隼破蚪絕。白日驪駒動悲壯。時攜寶玦青珊瑚。看花調笑當壚姝。結交老蒼五六輩。議論已逼東西都。功名不來心獨苦。卻望美人思遙浦。月中吹笛上丹邱。煙際飛帆拂天姥。浩然弔古登高臺。誰能酌子黃金壘。石橋聽雨青楓合。海門望日丹霞開。縣中許令高閑者。聞子悲歌在林野。自躡二履行相迎。手攀碧蘿卻鞍馬。秋風九月吹吳關。忽復鼓棹從東還。匡廬雲錦九千仞。片片飛落新詩間。獨攜稚子憐遠別。草堂臨流故幽絕。少年吐氣成紫霓。攬髮何堪半如雪。卻從帥幟坐談兵。直以精采空鯢鯨。樓船東下海波淨。劍光夜出清江城。由來壯志在短褐。空谷亭亭老柑栝。亦知楊子奈長貧。豈識相如故多達。

長安冠蓋日紛紛。有詔徵賢安得聞。白沙翠竹自江島。隔水臥看西山雲。我自來西山。城中迹如埽。誰家楊柳鳴黃鸝。忽見秋霜落園棗。雙溪之水東北流。上有繡谷青綢繆。長松遙挂海底月。眼明照見樽中愁。愁心復幾何。舒卷風中霧。落日斷雲氣。令人思元度。人生富貴須何時。莫謾窮愁傷汨之。君行可逐白鷗侶。亦棹酒船遊會稽。

寄答夏仲寅

宜春才子清時望。精神峭緊才疏放。野服不遊城市間。扁舟祇在江湖上。往年訪我珠林灣。草屋榛溪相往還。是時八月十五夜。明月東上仙槎山。君船政繫灣頭柳。玉瓶雙倒金陵酒。滿洲風露聽歌呼。水面寒光碎星斗。別來鴻燕邈相殊。宋郎忽寄雲中書。碧箋麗句細作字。秋水掩冉生芙蓉。東南轉戰幾千里。白雲在山招不起。使者空尋顏闔廬。神仙還入東吳市。今年五月勞遠尋。快開磯頭江水深。手持輕篋忽贈我。使我披拂清煩襟。如何相逢卽相別。回首音塵忽超越。松桂早已見清真。雲月何由比高潔。知君慣作汗漫遊。揚帆鼓柁春江流。重湖煙雨葭莢綠。我亦飄飄隨白鷗。

題張京尹所獻嘉瓜圖歌

南京五年夏六月。京尹獻瓜狀殊絕。駢甍雙承雕玉槃。連苞並進黃金闕。尹言產自句容縣。野老田夫駭初見。一葉連蜷引渾淪。兩壺磊砢連葱蒨。是日君王御武樓。徵問吏牒趨公侯。星聯翠影落丹辰。日射神

光浮冕旒。敕令捧至乾清殿。未擬先嘗須廟荐。詞臣上頌美真奇。畫史圖形著蕃衍。盛哉聖恩浩如天。民勤物阜宜豐年。小臣作詩紀嘉應。願繼大雅歌綿綿。

田接洪武五年六月。應天府句容縣民張觀家園產嘉瓜。雙實同蒂。圓如合璧。京尹張遇林函以素醜。圖其形於上。移文禮部。請以奏聞。尙書陶凱等奉瓜以獻。帝御武樓觀之。丞相汪廣洋等奏。漢元和中嘉瓜生於郡國。唐汴州亦獻嘉瓜。天錫珍符。實見于茲。帝謙讓弗居。命真乾清宮。翌日薦於太廟。特製嘉瓜贊以紀之。宋景濂亦有頌云。句容之墟。物無疵癘。神瓜挺出。殊實同蒂。瓜孰非單。比合而生。二氣毓質。雙星降精。蟹房均甘。圭冰競爽。明月重輪。彷彿堪象。此詩所謂詞臣上頌。當卽指景濂也。

寄萬德躬

日暮山風吹女蘿。故人舟楫定如何。呂仙祠下寒砧急。帝子閣前秋水多。閩海風塵鳴戍鼓。江湖煙雨暗漁蓑。何時醉把黃花酒。聽爾南征長短歌。

秋林圖題贈曠伯達

迴風蕭蕭吹北林。行雲冉冉生夕陰。天寒雁去洲渚靜。秋雨龍吟波浪深。飄泊共憐今日興。畫圖因見古人心。幾時螺子青楓下。深結茅堂更遠尋。

贈黃近賢自宜春過青原上贛州訪周錄事二首錄一

卽遣北風吹上灘。且含飛雪壓回瀾。沙頭走馬醒午醉。石裏買魚供晚餐。傳籤亭長迎水鷁。擊槳巴童歌木蘭。故人青眼望吾子。晏歲莫辭行路難。

題山水畫

山岡盤盤多樹林。江水湛湛愁人心。赤雲樓觀落日外。白石溪澗長松陰。嘯猿虛疑近翠壁。飛鳥劃恐迴高岑。野亭春色苦無賴。忽憶故人思遠尋。

感愧寄李子紳鄧子益

將軍屯戍落秋風。客子離思逐暮鴻。書劍遠投煙瘴外。鼓笳淒斷月明中。野猿引子溪藤綠。山麝眠香石竹紅。涼氣蕭森盤兩峽。直愁華露隕高楓。

過永和同子永劉憲史遊青都觀謁蘇黃二先生祠

金華仙人玉局翁。青都臺觀五雲東。十年喪亂殘碑在。前代風流二老同。海藏出雲龍啓蟄。松壇過雨鶴盤空。傷心落日滄江上。萬壘青峰照蕊宮。

水口田家

水口山腰三四家。楓林茅屋帶蒼葭。野人敲火夜然竹。溪女踏雲朝浣紗。水落寒潭魚可捕。草肥秋隴兔堪置。有時刀槩還登砦。雞犬蕭蕭隔暮霞。

花朝和王伯衢寄示

到處有花不待招。常年客裏記今朝。高林秀野含丹露。煖日晴雲動碧寥。樂事已嗟隨逝水。兵塵猶恐逐

驚飈。祇今誰醉蕪湖酒。腸斷東風十五橋。

觸事

眼見林櫻墜赤珠。愁隨庭草積氈毼。茶煙出戶自明晦。花雨拂簷時有無。把筆祇應酬嘯咏。杜門久已厭奔趨。檇襍一點林梢雪。悵悵幽禽不可呼。

題贈樸閣醫士

樸閣道人神宇清。手攜綠玉上南京。市中壺公自不老。海上安期知有名。當欄種藥花露溼。篝火斲苓松雨晴。鄱陽山水亦故里。何日放船歌濯纓。

海子橋午憩

海子橋西是泮宮。尋幽偶此憩青驄。一春時少催花雨。二月偏多擺柳風。瓊島晴薰煙澈合。金河凍釋水雲空。沙邊小艇無人繫。愁絕滄浪舊釣翁。

題生色海棠

生色海棠誰畫得。清溪著色最清真。柔條破玉枝枝潤。細葉垂絲朵朵勻。神女行雲巫峽曉。仙娥泣露錦江春。金盤華屋毋煩薦。日射銀屏正惱人。

許伯旅九首

伯旅字廷慎。黃巖人。洪武中。官刑科給事中。有介石稿。

詩談許廷慎若天台雁宕。雄踞東南。小杜之稱。豈容多讓。

田按廷慎詩格調高老。介石稿已不傳。朱竹垞云。赤城續志所載寥寥數篇。余極力搜訪。如明風雅黃巖詩集。差較完備。

悠然閣爲盤所賦

屏迹臥空谷。蕭然謝喧塵。晨興坐飛閣。若見南山來。雙鳥何翩翩。孤雲共徘徊。勝景自茲得。塵心日悠哉。有客方外歸。時來展幽懷。觴詠或終日。了無形迹猜。地迴機已息。語忘中自諧。願言蔣生徑。卒歲從君開。

題餘姚張氏翠竹軒

四明之西天姥東。青山崛起摩高穹。若翁種竹住其下。已覺地與桃源通。手招仙客碧雲裏。石室陰陰落花紫。秋風夜半天上來。洵若滄溟六鼇起。憶昨紅塵暗江海。金谷平泉一時改。冰枯雪死斤斧餘。不意此君今尙在。拂石彈琴坐碧溪。懸崖颯沓吹雲霓。壑龍春翻后土裂。皓鶴夜舞青天低。百年行役悲陟謁。軒中故物誰爲主。葛陂變化元有神。白髮淮南夢煙雨。我家有竹千萬竿。老屋蕭瑟常風寒。浪迹天涯未歸去。作詩愧我青琅玕。

題林藥所家藏子昂枯木竹石圖

魏公之畫今罕得。君家此圖纔數尺。酒闌客散試一觀。坐覺蒼煙動虛壁。春雷劈樹江雨黑。奔濤瀆瀨鳴。

相激。乘槎仙去。珮聲寒。夜深卻抱支機石。想當意到揮灑時。衆史見之應辟易。精靈慘淡出肺肝。殘墨淒涼靚顏色。買舟昔日過吳興。載酒曾上鷗波亭。當時池館意蕭瑟。但見水竹含空青。百年興壞未易明。草堂昨夜風雨驚。山靈怪我且歸去。醉臥白石聽秋聲。

題趙撝謙六書

六書變滅同雲霞。後有作者誰專家。考亭先師昔志此。老弗及爲猶嘆嗟。君生遠在考亭後。執策無從道何授。力窺篆隸著明言。百世重是清門胄。陰陽垂象日月懸。宮徵迭奏聲相宣。神融理得非偶爾。旁暢曲通因自然。荒墳斷簡科斗蠹。猛雷破石天書露。昔人辨鑿極微茫。非君孰得知其故。文章與世相推移。道在勿憂知者稀。休風一散久當復。我已識子窮幾微。時時灑翰寫胸臆。巧匠旁觀慘無色。短椽挂壁風雨來。古劍騰波百靈泣。往代揚雄空好奇。閉屋草元頭盡絲。至理無聞世無補。更千萬語今何爲。趙君趙君當自惜。持此自可垂金石。聖賢墜學久寥寥。上帝毋令六丁得。

題林盤所學民家藏溫日觀葡萄

張顛草書天下雄。醉筆往往驚羣公。溫師作畫亦若是。我知畫與書法通。葡萄何來自西極。枝蔓連雲引千尺。世間畫者誰最高。溫師自有葡萄癖。當時豪貴爭邀迎。掉頭趨走呼不應。酒酣耳熱清興發。揮灑始覺通神靈。東家雪練西家帛。布地待師師不惜。芒鞋踏墨雲海翻。滿把驪珠輕一擲。百年畫意誰見之。破

幅蕭條今尙遺。心垢都除入清淨。不爾妙悟何能爲。憶我攜書客淮右。大官都送葡萄酒。寒香壓露春甕浮。風味江南未曾有。林君對此心忉忉。謂余亦種葡萄苗。何當釀酒三千斛。愁來一飲三百瓢。

題畫

斂迹臥空谷。居然謝囂喧。間庭落葉滿。始覺風露繁。夕照墮木末。秋陰入雲根。心清趣自得。何必棲桃源。

松山道中貽林左氏

簪組非吾好。邱園乃素心。孰知西郭路。重爲故人尋。水落江逾壯。天寒日易沈。飄零慚夕鳥。栖息每同林。題扇面小景爲王徵冲賦

日脚下林垌。秋光入戶庭。斷雲歸絕壁。飛鳥墜空青。松籟風中得。漁歌石上聽。扁舟如可問。吾亦泛滄溟。奉西野王先生

遠遊無復賦離騷。歲暮猶思范叔袍。歸去釣竿秋水隔。坐來庭樹月華高。魚龍矯矯矜鱗甲。鴻雁冥冥惜羽毛。迴首寒江易蕭瑟。放歌時覺寸心勞。

曹睿二首

睿字新民。永嘉人。占籍華亭。元季爲郡學訓導。明初遷松江教授。有獨興集。

明按新民至正辛丑。倡爲景德詩會。會者十四人。前此慶子。經同知思恭。有南湖詩會。亦十四人。僧克新總編。爲至正庚辛俱。

和集周伯琦爲之序。會者若高太常巽志、徐教授一夔、鮑徵士恂、牛尙書諒、周山長棨、張學訓、竇皆一時書宿也。

景德寺詩會

清晨出城郭。悠然振塵纓。仰觀天宇淨。俯矚川原平。竹樹自瀟灑。禽鳥相和鳴。龍淵古招提。飛蓋集羣英。唱酬出金石。提攜雜口罌。丈夫貴曠達。細故奚足撓。道義山嶽重。軒冕鴻毛輕。素心苟不渝。亦足安吾生。

徐一夔至正辛丑倡和集。跋至正辛丑秋七月十有三日。永嘉曹睿以休假出郊。憩景德寺。諸公攜酒相慰藉。環坐以唐人因過竹院逢僧話。又得浮生半日閒之句。分韻賦詩。雲海師因哀集成帙。以志一時之良會云。

西湖竹枝辭

昨夜西湖月色多。照見郎君金叵羅。明朝江頭放船去。江亭風雨奈君何。

邱民一首

民字克莊。揚州人。徙居嘉興。

景德寺詩會得僧字

上方鬱嵯峨。遙睇青雲層。餘霏不成靄。朝陽射觚棱。雙湖鏡光澈。涼颿滌煩蒸。輕裳欲飄颻。短髮仍鬢鬢。縱觀極夷曠。頗覺秋氣澄。載瞻雷音堂。招搖肅高僧。英英竹隴雲。耿耿羅龕燈。甃甃天花滿。爐香夕煙凝。散坐百慮息。幽懷詎能勝。澗泉煮芹葵。山盤羅芡菱。伊予夙口口歌遊。廁賓朋。世事良可歎。有酒當如渾。

韓守益一首

守益字仲修石首人。明初以儒士攝教宜都。擢廣西按察僉事。入爲御史。改春坊中允。有樗壽藁。

楚天樵語樗壽集中。文丞相祠詩云。黑光盡日陳橋變。青氣移星海島悲。語何等沈痛。

過采石磯懷李白

製作隆中古。寥寥大雅音。文章關有道。天地豈無心。白也才何逸。時哉陸易沈。蛾眉亭外月。還照大江濱。

吳琳一首

琳字朝錫。黃岡人。太祖下武昌。以薦召爲國子助教。吳元年。除浙江按察僉事。入爲起居注。洪武四年。遷太常卿。進兵部尙書。六年。改吏部尙書。

田按朝錫官起居注時。侍遊上苑。賜宴奉天門。帝命賦詩。以述今日之樂。官尙書時。陪侍方邱。帝命朝錫及宋景濂。率六部文學之士。賦柳榆荷露詩。可謂榮幸。惜集不傳。僅見寥寥數詩而已。

煙波亭

漢水連天闊。江雲護曉寒。青青山數點。最好倚闌看。

趙俶一首

俶字本初。山陰人。元進士。洪武初。徵爲國子博士。加翰林待制。致仕。

田按本初官博士四年。諸生多成就者。加翰林待制致仕。蓋本初將致仕時。加待制以榮之。詩綜直云。官翰林待制諱矣。本初

之歸也。京朝士大夫作詩贈其行。宋景濂有序紀之。史稱本初子圭。玉兵部侍郎。出知萊州有聲。劉子高寄圭玉詩云。海神廟下波濤壯。萊子城邊草木稀。作郡新聲隨日起。趨朝舊夢逐雲飛。紀有事也。

聽雨樓卷

幽人愛樓居。燕坐風雨夕。高檐瀉飛湍。空除墮殘滴。傾耳疑枕流。屏喧時岸幘。江聲暝蕭蕭。樹葉寒濛濛。境絕迹更佳。趣淡情自適。霽曉恰憑闌。春深杏花赤。

明詩紀事卷十二

甲籤

吳伯宗一首

伯宗名祐，以字行。金谿人。洪武辛亥開科，廷對擢進士第一。授禮部員外郎，與修日歷，以事謫居鳳陽。尋召還，奉使安南，歸除國子助教，改翰林典籍，除太常寺丞，辭。改國子司業，又辭。貶金縣教諭。召還爲翰林檢討，進武英殿大學士，降檢討。有南宮使交、成均、玉堂集二十四卷。

田按辛亥爲明興首科，伯宗以剛直顯，可謂得人。是科讀卷者爲國子祭酒魏觀、太常博士孫吾與、給事中李顏、修撰王傑、觀、早朝奉天殿詩云：多士聽宣魚貫入，諸侯分直雁行聯。紀其事也。先是有詔，高麗、安南、占城等國，如有經明行修之士，各就本國鄉試，許貢赴京師會試。高麗金濟中三甲，授東昌安邱縣丞，以不遵華言，請還本國，詔給道里費送歸。

題秋江回驛圖

大江瀉奔流，浩蕩去不息。青岑列兩岸，倒影搖空碧。樓高野陰闊，錦樹覆沙驛。帆落天際雲，人歸渡頭夕。緬懷滄洲趣，萬里見秋色。長嘯倚西風，因之豁胸臆。

劉三吾二首

三吾初名崑。後名如孫。字三吾。以字行。茶陵人。元末提舉靖江學。洪武中。以薦授左贊善。累遷翰林學士。降國子博士。尋復學士。三十年主會試。坐罪戍邊。永樂中卒。有坦坦齋集二卷。

鄂顯鶴沅湘耆舊集。坦翁以文學顯。諸家紀載。有謂其以罪死於洪武時者。今按詩集中。得告致仕。過長沙詩。結語云。八十還家能有幾。當時晝錦今堪誇。知其優游故里。以老壽終。諸家所記。皆不確矣。詩迅筆直書。不暇矜鍊。雖時病粗豪。要有真氣。至其憑弔故墟。感時書事。諸作。悲涼沈鬱。不減遺山。

田按學士詩有佳句。殊少完篇。哭伯兄存吾推官云。黃甲題名前進士。白頭死難古宣州。湘中紀行云。流水石梁迷故宇。夕陽煙樹出疏鐘。與先復初州判云。欲涉湘江采舊杜。美人遙隔暮雲中。次蔡元禮過洞庭云。欲向黃陵懷帝子。鷓鴣嘯處雨斑斑。皆可誦也。

姑蘇卽事

姑蘇自王亦豪雄。藩屏東南一旦空。使眷爲誰歸火底。俘囚何面見江東。王封有愧非殊錫。死去無碑可表忠。粳稻祇今誰阻遏。海門元與直沽通。

靜志居詩話。學士元之故老。其詩雖不中程。足補庚申外史。當張士誠在吳。海運阻遏。元主以御酒龍衣。請之不得。及蘇州既平。學士賦詩云。姑蘇自王亦豪雄。藩屏東南一旦空。粳稻祇今誰阻遏。海門元與直沽通。又云。吳中既失無門戶。海道長驅有軸轡。蓋猶觀元之未亡。其云。廉簡同心如結好。蜀吳異地豈俱亡。則有感羣雄之失策。至云。萬年圖籍來江表。一曲琵琶度塞門。斯與宋文恪過元故宮詩。並其懷切矣。

送龍天章歸省玉融

柏台使者開薇省。幕下諸賓聚壁奎。紅藥詩情灑水上。白雲親舍玉融西。舊家門巷烏衣在。故國江山杜宇啼。若過州城舊廳事。爲余重覓昔年題。

汪叡一首

叡字仲魯。婺源人。元末集義旅。保鄉邑。明師下。休甯來附。授安慶稅令。徵贛川蜀軍事。以疾辭歸。洪武中授左春坊左司直。

予歸江左澤往四明

倚閭憐母老。長路望兒歸。六載眼中淚。三春身上衣。風高聽雁遠。天闊見雲飛。海嶠連閩越。烏嘯月尚微。

朱善一首

善字備萬。豐城人。洪武初爲南昌教授。召試授翰林修撰。謫遼東教授。未至。放還鄉。召爲翰林待詔。擢文淵閣大學士。請告歸卒。正德中諡文恪。有一齋集十卷。遼海集五卷。

田按備萬青年立朝。燕享賜坐殿中。與劉三吾。汪叡稱三老。文章和平澆衍。名雖不及潛溪。華川之盛。在明初亦足名家。

長短句

翁騎驢兒牽車。童子荷擔相追隨。風淅淅。草淒淒。阿兒苦寒翁苦饑。翁雖不語心傷悲。吁嗟薄命當訴誰。遼東雖云樂。不如早旋歸。

龔敦二首

敦鉛山人。元末以明經分教廣信。洪武初徵爲四輔官。以老乞歸。復起爲國子博士。遷司業。再遷祭酒。有鵝湖集六卷。

田按洪武十三年。戶部尙書范敏。薦耆儒王本。杜佑。龔敦。杜敷。趙民望。吳源等。召至。命爲四輔官。繼爲是官者。有安然。李幹。何顯周。不久官廢。余力搜諸公詩。其可見者。二敦一吳而已。史稱敦爲司業。與祭酒宋訥。司業王嘉會。共定學規。三人年高鬚髮皓白。終日危坐堂上。肅然。余嘗檢訥西隱集。勅建太學碑文云。上躬臨學。學官率諸生進拜堂下。博士臣龔敦執經。是敦又嘗爲博士矣。鵝湖集中佳句。如眼前此景不易得。客裏好懷先自開。雨昏湖口生春水。天入江東有暮雲。夢熟池塘春晚後。酒醒窗戶月來時。殊自軒爽。

瑞洪夜泊

三月江南雨滿湖。魚吹花浪鳥相呼。疏燈照水夜明滅。遠樹入山雲有無。水國田燒人薤草。酒船風靜客樗蒲。柳陰不見垂綸者。卻道煙波是畏途。

雜咏

越王臺上鷓鴣嘯。七國岡頭滑滑泥。欲識故人無限意。晚煙疏雨畫橋西。

杜敦三首

敦字致道。壺關人。元末舉河東鄉試第一。除高平教諭。遷臺州學正。洪武中徵爲四輔官。以老病

歸有拙菴集十卷

田按拙菴集明史藝文志著錄而選家多不之及余從程之珪潞安詩抄錄數首明初山右之以詩鳴者致道其開先矣致道嘗竊宋西隱爲祭酒稱爲得人常侍宴游聯句賦詩太祖特幸其私第亦可謂儒臣之榮遇矣

玉峽關

太行盤盤橫厲中原近引河朔遙綴崑崙太原大梁爲國雄藩壺關林慮界於花園烏道崎仄輪催馬煩怪石羅列熊舉豹蹲連崖壁立屹如垣墉絕頂中斷是曰風門俛臨夜壑仰逼朝暎一夫獨立萬騎空屯設險甚固王者道存迺告守吏爰作鍵關勒銘巖阿寵以瑤琨匪險在德用戒昏

虹梯關

石崖攀天仄磴千迴邱隅塞明俯臨蔽靈鐵壁句連谿笏中開觀者駭魄行子心摧互如長虹橫絕天階彼昏者氓肆其喧慝爰據巖險以抗震雷卒于天刑亦孔子哀太行之阿大河之隈關門弗嚴惟帝念哉北山有石南山有材經之營之突焉崔嵬侍臣作銘以詔後來

謝友

客遇中秋感慨生眼空節物坐茅亭長空萬古此明月故友幾人如曉星南北連天猶戰伐衣冠何地不飄零呼童旋貰西隣酒拚卻今朝醉不醒

吳源一首

源字性傳。莆田人。洪武初。官興化教諭。徵爲四輔官。以老乞歸。復起爲國子司業。有文集二十卷。抱素軒稿八卷。

風雨既定星月皎然輾轉不寢有感

不眠知夜永。無語覺心清。慷慨思時事。沈吟見物情。賈生愁論政。趙括易談兵。家國憂方大。憑誰訪老成。

張兌一首

兌慈利人。元進士。入明官翰林院編修。

天門山圖

我家三世居山國。寢食嬉遊見山色。去年前作京華行。萬里平原載車轍。荆山嵯峨鎮南紀。華嶽金精照秋水。太行綿延墜馬首。北望居庸雪中峙。歸來汎舟淮與江。匡廬相接高崆峒。南過瀟湘望衡嶽。九疑蒼梧羅煙幢。此生倦遊歷艱險。故山岷嶽聊遊衍。今年直上天門峯。始覺從前興猶淺。天門洞開雲氣通。江東峩眉皆下風。低昂二八若昆季。意氣相傾爭長雄。清猿夜唳霜竹折。猛虎晝號山石裂。風來往往神聽聞。日上時時天帚揭。煙蘿敷紛薜枝垂。細禽飛來如棗肥。六月仙源溪水漲。中有洞府藏蛟螭。可憐宜都周內史。古冢壘壘在山址。感時撫景亦愴然。周朴短篇焉足擬。茲山冠絕平生遊。安得雲梯登上頭。左攜

赤松右浮邱。下視八極塵埃浮。楊侯此圖誰爲寫。天下名山無似者。他日功成期早歸。相與爲鄰住山下。
王嘉會一首

嘉會名應隆。以字行。嘉興人。占籍松江。以明經徵。授檢討。遷司業。

田按嘉會官司業。號爲稱職。詩不多見。

題許士雍紫翠丹房

揚子江頭紫翠峰。移家曾住白雲中。新居今與湖山近。擬覓刀圭訪葛洪。

全思誠一首

思誠字希賢。上海人。元松江學正。洪武中。徵爲文華殿大學士。以老致仕。有砂岡集。

次雲林韻寄孫君實

腐儒筆耕豈謀生。與世濩落獨高情。綠尊有酒誰共醉。素琴無絃聊自橫。湘簾在鉤月當戶。羌笛惱人花滿城。幽居不知春事盡。見客只言詩未成。

周滇一首

滇字伯甯。上元人。明初爲大理寺丞。累遷至刑部尙書。

曾懷江西詩徵。周滇鄱陽人。與李宗頤、劉原善、辛敬、萬石、楊伯謙輩。稱江西十才子。

田按宋景濂序劉子高詩云。子高束書走豫章。與辛敬、萬石、周漬、楊士宏、鄭大同遊。五人負能詩名。相與揚權風雅。劉仲修序子高詩亦云。豫章萬石、大梁辛敬、襄城楊士宏、秣陵周漬、鄭大同。以歌詩自雄。子高與之馳騁上下。名聲相埒。據此五人中。惟萬石爲豫產。其餘皆僑寓於豫章者也。列朝詩集。明詩綜。金陵瑣事。稱漬爲江甯人。明史江西詩徵。稱漬爲鄱陽人。一據其本籍。一據其流寓耳。子高與漬交分不淺。寄詩云。交友今誰在。東遊最憶君。清尊澄夜月。綵筆動春雲。楚甸烽煙合。秦淮樹色分。相思愁日暮。花落正紛紛。又題薛克恭金陵竹西堂歌云。上元周漬吾故人。別來五見桃花春。昨朝卷中誦題句。使我感慨懷清真。漬集不傳。所可見者。列朝詩集數詩而已。

寫江岫春時圖

汀洲碧草生。鳧雁動春聲。莫上高臺望。能傷送別情。

田按尙書善寫山水。蘇平仲題周伯甯春晴江岫圖云。尙書襟懷絕瀟灑。揮毫往往凌董馬。平生一筆頗自珍。數尺新圖爲君寫。吳友雲有題伯甯江山送別圖詩。劉子高有題伯甯梅谿圖詩。又贈曾沂畫山水詩序云。上元周漬伯甯。以翰墨名。品重當世。曾生及門而受益焉。余徧檢紀明一代畫家者。無尙書名。當據此數詩。以補其缺。

滕毅一首

毅字仲弘。鎮江人。太祖征吳。以儒士見。授起居注。吳元年。出爲湖廣按察使。洪武初。擢吏部尙書。改江西參政。

三閩大夫祠

襜帷褰薄暮。迴颺吹白雲。下有栖神宇。慘淡臨江濱。行吟旣不返。遺響甯再聞。綠榮并丹綵。婉爾含清芬。

沐芳正冠佩。酌水炷夕熏。長歌靈谷應。春思何紛紛。願言卜瓊茅。巫咸不可羣。渚宮望儀羽。再拜雲中君。
楊訓文一首

訓文字克明。潼川人。元淮海書院山長。明初徵爲起居注。歷左司郎中。太常卿。出爲湖州知府。改知汀州。擢禮部尙書。改戶部。出爲河南參政。

采石

騎鯨仙人海上歸。至今草木猶清暉。千山落日送樵笛。萬里長風吹客衣。春空蛾眉浮翠黛。夜光犀渚沈珠璣。神遊故國應過此。高冢臨流知是非。一作滕殺詩。

李質二首

質字文彬。德慶人。元末爲何真府掾。洪武初歸附。授中書斷事。改都督府斷事。擢刑部侍郎。進尙書。尋出爲浙江參政。以老召還京師。復起爲靖江王相。坐法死。有樵雲稿。

田按文彬身丁元季。海水羣飛。集兵保障鄉里。援攬士類。名士客嶺南者。茶陵劉三吾。江右伯顏子中。羊城孫賈。建安張智。皆往依焉。宋景濂所謂。鶴紳之勝流。岩穴之處士。矍然稱李公也。其死也。賈有詩挽之云。相國靈鑿闕九京。桓桓松柏表佳城。風雲已際興王運。雨露偏傷孝子情。一代文章遺竹簡。千秋彝鼎勒勳名。平原賓客今誰在。獨瀉椒漿帶淚痕。

遊西湖與徐都尉分得香字

輕雲閣裏弄春光。湖水湖山引興長。苕帶漫縈春浪細。宮花初試越羅香。荷杯擎露鮫人泣。翠葆掀風海樹涼。好傍綠陰維畫舫。高歌白紵送清觴。

過揚州

三十年前記此過。皆春樓下駐行窩。十千一斗金盤露。二八雙環玉樹歌。自昔瓊花祠后土。至今荊棘臥銅駝。江都門外王孫草。怨入東風綠更多。

韓宜可一首

宜可字伯時。會稽人。洪武初。薦授山陰教諭。改楚府錄事。擢監察御史。出爲江西按察僉事。坐事免。復徵至京。授山西布政使。謫安南。建文時。起雲南參政。入拜左副都御史。卒官。

田按伯時官山西布政時。以事安置安南。建文帝卽位。用檢討陳性善薦。起雲南參政。列朝詩集。明詩綜。均云謫雲南。誤矣。

題蓬萊深處

聞道蓬萊別有春。五雲深處隔凡塵。松迷鶴逕渾無路。花暗簫聲不見人。滄海日華翻貝闕。三山霞氣逐鸞輪。劉郎自是神仙侶。何用天台更問津。

張籌一首

籌字惟中。無錫人。舉元浙江省試第一。洪武初。以薦授翰林應奉。改禮部主事。出爲湖廣參政。擢

禮部尙書。坐事罰輸作。起禮部員外郎。尋復尙書。

田按惟中七古有氣概。餘詩多不入格。

劍石歌

干將飛空化爲石。石耶劍耶誰復識。陽文蘊秀墨色古。陰縵積潤苔花碧。卻疑女媧補天時。手斷鯨足爲立極。風霜剝蝕綠龜紋。鬼神攜護蒼龍脊。東吳南越事已矣。何物君家乃有此。好奇笑殺白猿公。有道終歸赤帝子。日出遙瞻殺氣凝。雨洗似聞妖血腥。煨煉不資爐鞴力。胚胎自是陰陽精。鳳山見之三太息。至寶恐爲豪者得。翩然作歌頌其德。神物揮霍生顏色。我能爲爾礪鋒鏑。發爾幽潛使昭赫。出掃妖邪扶正直。莫令良善相戕賊。慎勿立此空庭側。

黃肅三首

肅字子邕。建昌新城人。元季官禮部主事。明初歸附。命仍故官。擢侍郎。降工部郎中。復擢侍郎。進尙書。出爲廣西參政。坐黨禍死。有醉夢稿。

田按明初新城稱詩者。劉子靈。黃子邕。二人皆長於古體。王忠文序醉夢稿云。子邕斥漫衍以爲簡。屏華縟以爲質。黜奇詭以爲平易。華靡以爲質。殆幾於古。可謂知言。

長相思

望歎城南頭。覽取別時路。路上有深井。井上有雙樹。樹有東西枝。枝葉盡相附。去年東枝榮。今年西枝悴。年年望樹枝。樹發行人歸。

寄劉紹

城南劉子憲。來往卽吾家。連榻書樓小。鉤簾石壁斜。金圓霜捧橘。冰碎夏分瓜。苦爲吟詩癖。更闌更煮茶。
田按明音類選。稱劉子憲吉安人。竹垞詩話云。胡子申爲子憲作山居十詠。其三曰。仙臺山在新城三十里。子憲非吉安人審矣。此詩首二句。城南劉子憲來往卽吾家。子憲子邕。皆新城人。尤爲確證。

明日知何地。杉關十月天。遙憐五載隔。不見一書傳。簸蕩聞還海。艱難愧客燕。幾時歸碧澗。相對看紅泉。
劉紹十八首

紹字子憲。以字行。有號緯蕭野人。建昌新城人。洪武初。官翰林應奉。詩載元音遺響。

田按元音遺響十卷。前八卷。南城胡布詩。後二卷。南城張達及子憲詩也。布字子申。達字季充。皆以隱居終。惟子憲入明。曾通仕籍。提要云。三人皆元遺民。綠編輯者。旣題元音。而子憲在明初。名不甚著。故誤稱遺民耳。建昌志。及徐泰皇明風雅。皆云官翰林。應奉。明初江右詩家。首推劉子高。如子憲者。正可雁行。子憲五言。風骨勁特。蓋與胡張生同鄉。曲雅志復古。觀子申與子憲論詩文云。黃口至白髮。鼎鼎鳴文章。嚶嚶古之人。濡沫批與椽。旣無卓爾見。難局升斗量。披竊月露餘。已如風雷翔。翹首故踈踏。種辭聲老蒼。識每下萬人。足未踰一邦。師學無從來。反規以求方。留難譏苦澁。陳腐如馨香。烈烈三百篇。王風肇鴻龐。五言起漢魏。已泄大雅莊。文字炳秦漢。六代弊流唐。對偶一相諧。理趣因隨亡。現事尖麗間。委曲叶宮商。言新意不續。遺失語徒狂。樸素輕典型。巧薄高飛揚。稍無效顰恥。安受時譽光。我欲竟此曲。此曲悲且長。枉君陳矢辭。端端世儒行。趣響旣高。宜其詩

之不蹈凡近也。

秋懷

高步視六合。河山邈悠悠。浮雲西北來。慘淡增我憂。世乏稷高儔。皇皇將焉求。乾坤妙闔闔。元氣浩不收。經綸信有待。明哲奚淹留。自非遺世士。何能守斯邱。

雜詩示宰獻

日暮懷所思。涉江采芳澤。飄飄蘭蕙花。春氣滿南國。如何同心人。言笑千里隔。采之不成遺。中道真愉懌。淒風忽悲鳴。鷓鴣聲惻惻。恆恐芳意摧。榮華不常得。

送王潤之官陝西

遠宦入秦關。雞鳴肅征袂。咸陽秋莽蒼。古水咽清渭。登臨盼形勝。立馬慨興廢。落日照終南。行人在空翠。淒涼鄉國念。慘淡遊子意。孰和莊舄吟。遐思渺天外。翳余契金石。惜別勞夢寐。何所更持情。臨分乏瓊珮。

送李端甫歸覃懷

典教出中州。趨庭憶河縣。長波瀉天塹。掛席過淮甸。游雲澹飛雨。碧樹鬱葱蒨。豈不煩爾思。臨衢極深盼。繁華貴知止。道養沐殊眷。日暮念遊方。升堂慰情戀。論交我無晚。結分誠婉孌。悵望王屋雲。懷人夢中見。

鍾山曉晴圖爲尙書生陳宗進賦

靈崖多幽姿。朝日射翠微。丹黃冒其頂。絳氣蔚以彌。粲粲梵王宮。朱甍儼崔嵬。雲光發天藻。綴戶分陸離。遐瞰極鴻濛。元和固天倪。瓊英灼三秀。玉樹交春蕤。我願酌石髓。駕言候安期。天門正鳴鳳。拳拳梧桐萎。涿州

真定城

抱介恥儂媚。離光滋慨慷。叩關道無由。惻惻辭帝鄉。寒冬百卉腓。驅馬踐嚴霜。晨過涿鹿城。驚飈恍沙場。息徒用稅駕。遐眺臨空荒。羣山從西來。千里橫青蒼。倚劍事悲咤。令人憶軒皇。蚩尤今則無。戰伐何茫茫。落日笳鼓發。連營旌旆揚。吾行竟何之。流止嗟殊方。

滹沱河

客行抵燕南。獨夜車軋軋。斜月耿流光。繁星動天末。逶迤出深壁。彷彿見城闕。擊柝接耳聞。哀笳向晨發。維時重圍解。二鎮兵禍結。吞噬徇乃私。邊隅忍流血。防虞此何謂。國恥殊未雪。感此竟惘然。悲歌激林樾。

磁州市

鳳駕違鎮都。客行有前期。蓬飛歲將晏。恨恨臨高岐。長河動我前。夾岸流水澌。需次向晨渡。馬鳴遊子悲。天寒野無人。世梗道路疑。豈無故鄉懷。辛苦曷得辭。貧賤本吾分。險艱庸自持。嗟哉雲臺勳。千載今得知。

高原黯平蕪。霜重日色死。客懷增悲辛。行邁日靡靡。汾陽跨邢衛。雞犬接閭里。隱賑富人煙。魚鹽喜成市。

岐亭向朝泊。接浙事薪水。貫酒慰我徒。停驂縱遐視。側聞西州事。脣齒莫相倚。列戟滿潼關。并吞詎能已。
鄴下述懷

殘壘宿歸雲。鴉鳴滿長洲。驚風日夕起。倒捲漳河流。借問客遊子。蓬飛幾時休。沙塵暗長淮。風雨迷舊邱。
獻業不得意。征車曾少留。此邦古名都。控帶綿西州。井竈列萬家。甲兵當戎蒐。以守足固禦。以功代先謀。
在昔雄武人。憑城逞英猷。蟻封曹瞞塚。塵滅高歡樓。陳迹竟已矣。登臨眇予愁。

清化鎮

驅馬出衛郊。羈離嘆流穴。窮冬天雨雪。所歷涉深恐。茲晨過名鎮。井屋河山拱。天外見戍樓。雲旗晝飛動。
江淮事綿邈。關陝勢奔洶。大廈孰得扶。持艱百千孔。棲幽緬龍臥。上乘驚鶴寵。行矣拂青萍。悲風鼓余勇。
福昌寨在宜陽西

嵒隴通宜陽。中條勢聯絡。嶄巖福昌寨。岡阜相倚薄。上平衍千畝。下瞰延清洛。喪亂設重關。哀笳間鳴柝。
我行愧口歲。憑覽感今昨。秋色滿南雲。寒聲殷寥廓。蒼茫嵩穎思。寂寞采芝約。孰與濟時難。含凄嘆淹泊。
河南露寶寨近嵩州鳴皋地

搏壁上層峯。乘雲躡天關。風濤鼓羣有。九野何漫漫。二氣無端倪。陰陽自循環。河山拱中區。萬古情不刊。
而我一粟微。覽之意茫然。天地則瘡痍。風塵靖荆蠻。連山黯巫衡。殺氣迴飛翰。感往豈不感。悲來愴朱顏。

宜陽洛南山二十里至楚家莊

洛陽多青山。走勢連二室。幽林石巖崿。谷轉峯岌鬱。我行觸奔突。登頓迷徑術。沍溜發岩光。寒陰籠白日。況聞避地人。陶復相比密。喪亂各因依。偷生餘餽飢。兵戎幾時已。撫事傷懾質。山空魍魎號。石裂蛇蟒出。豈復慰曩懷。行行悵如失。

落雲軒

華頂拂秋影。陽林澹初暉。山雲落層軒。爽氣吹岩霏。默爾契心賞。橫琴當翠微。飛蘿結松暝。雨色涵清池。信美子雲宅。載醪將問奇。

題畫

嘉禾結繁蔭。山房抱秋陰。開門白雲入。爽氣吹森沈。惆悵飛羽夕。清歌對孤岑。誰與賦招隱。興發邱中琴。

江風山月亭

華月上蘿壁。江風澹疎櫺。金波泛遙渚。長夜秋泠泠。蕭瑟瀛海思。悲歌緬雲屏。無彈五十絃。恐有蛟龍聽。

送李成還山西省詩

馬首去離亭。西行幾日程。山圍潞子國。雲接太行城。驛道秋花白。沙津候雁鳴。到家晨省日。應悉未歸情。

明詩紀事卷十二

甲籤

袁凱二十首

凱字景文松江華亭人洪武三年舉人薦授監察御史以病免歸有海叟集四卷

何景明大復集我朝諸名家集獨海叟詩爲長叟歌行近體法杜甫古作不盡是要其取法亦必自漢魏以來者其所造就蓋具體而未大耳

陸深金臺紀聞國初高季迪與袁海叟皆以詩名而雲間與姑蘇近殊不聞其還往唱酬若不相識然何也都元敬嘗道季迪有贈景文詩曰清新還似我雄健不如他今其集不載是詩元敬得之史鑑明古史得之朱應祥岐鳳岐鳳吾松人以詩自豪於一時爲序在野集者其事雖無考然兩言者蓋實錄云

國雅袁侍御景文才情迥拔往往有奇語尤閑于詠物其題白燕聞笛頗爲時口脍炙

香祖筆記明初詩人共推高季迪爲冠而大復獨以海叟爲冠空同許爲知言今讀其詩古詩學魏晉近體學杜皆具體而微耳遠躋之青邱生之列未免失倫

明詩別裁李獻吉謂海叟師法子美何仲默謂歌行得杜之體鄙意傷於平直未極變化若七言斷句在李庶子劉賓客間青邱孟載俱未及也

田按孝陵殿切。海叟以權譎免幸矣。大雅集錄海叟蚊詩云。羣蛇戢戢方鬪爭。蝦蟇螻蛄相和鳴。百足之蟲行無聲。毒氣著人昏不醒。蚊蚋雖微亦縱橫。隱然如雷吁可驚。東方日色苦未明。老夫閉門不敢行。蓋元季傷亂之作。何元朗四友齋叢說引爲譏切太祖亦附會之過也。海叟詩骨格老蒼。摹擬古人無不逼肖。亦當時一作家。何大復標爲明初詩人之冠。過爲溢美。宜諸公之不取也。

下直懷北山隱者

載筆侍雲陛。向夕始餘閒。撫彼清冷觴。慰此憂戚顏。出軒月纔皓。臨街露已繁。廣庭行且止。修檻去復攀。幽樹靄深翠。餘花發微殷。俯仰不知夕。星漢忽西還。歸來空房臥。嚴城漏欲殘。鴉鳴九井動。劍佩亦珊珊。將隨夔龍後。祇肅謁重關。緬懷息心侶。遺世在雲山。焉能從之去。逍遙巖桂間。

遊西墅

吳王逐獸地。士衡聞鶴亭。古人不可見。荒原今獨行。遺堵儼若存。阡陌復縱橫。依稀望極浦。迢遞盼春城。江樹旣瞻靄。原花復晶熒。長煙覆漁屋。白水亂鳧汀。山川豈云異。人事有消停。卽此傷往時。聊復樂其生。寄言後來士。此理可自明。

池上三首

秋池行樂去。他樹色已暝。露下夕衣涼。月上風簾靜。饑禽墮疏竹。鳴蛩出深井。夜久人事息。蕭然諸念屏。振衣書齋客。逍遙池上步。林隈薄霧起。石隙幽泉度。鷗迷夕樹返。魚觸秋荷去。清聲水上來。欲去更延佇。

僧友人早出郊

離羣寡游豫。得朋殊繾綣。相將度春水。散漫入芳甸。班荆煙乍斂。摘花露猶泫。林鶯坐未出。沙鳥飛還見。遙山浮空翠。晴雲曳輕練。一聽野人言。復起滄洲願。

觀朱澤民所畫山水有感

朱公畫圖愛者衆。聲價端如古人重。王卿鉅公數見尋。往往閉門稱腕痛。我時挾冊遊郡城。朱公愛我詩律精。時時沽酒留我宿。共聽西窗風雨聲。清晨起來忘洗盥。短衣飄蕭臨几案。大行中條眼底生。岩岫冥冥氣淩亂。禹鑿龍門疏洛水。根入黃河源不斷。南及衡陽抵桂林。東入會稽連海岸。是中真我一畝宮。正如浮萍在江漢。溪流澗澗石齒齒。夾岸桃花途遠邇。原頭煙霧散雞犬。屋裏詩書雜童穉。扁舟遠來知是誰。豈是昔日鷓夷皮。五湖蝦菜殊可樂。千古功名何足奇。只今四十有三載。公竟不歸畫圖在。世閒好手豈易得。終日紛紛勞五彩。感時念舊心獨苦。況我頭顱白如許。呼兒捲卻不忍看。白髮高堂淚如雨。

贈張鳴善

白帝城中客。清秋碧海旁。乾坤方洶洶。身世獨遑遑。萬里空形影。全家墮虎狼。悲歌三百首。一一斷人腸。

春日偶書

罷官御史府。屏迹五湖東。江水供漁釣。山花費酒筒。野情方浩蕩。高論入虛空。明日春田事。還尋荷蓀翁。

江上早秋

靡靡菰蒲已滿陂。菱花菱葉共參差。卽從景物看身世。卻怪飄零枉歲時。得食野鳧爭去遠。避風江鶴獨歸遲。干戈此日連秋色。頭白尤多宋玉悲。

南村

南村煙樹接蒹葭。白鷺翩翩滿白沙。此地遂成茆屋計。何人更識老夫家。卽開斷壘行新竹。便接平皋樹雜花。戎馬紛紛終未已。此身泛泛獨長嗟。

寓所

草閣閒庭春水邊。雨蒲風柳自紛然。隣翁對客還爭席。水鳥依人欲上船。西北朝廷無使節。東南城郭自烽煙。老夫避地非遊說。正少蘇家二頃田。

次楊廉夫先輩韻

吹笛春江煙霧稀。幽芳小草總相依。巫峽寧知雲雨夢。滄州欲拭芰荷衣。花閒鸛鶴迎人起。波上魚龍挾棹飛。不似南州庾開府。鄉關頭白苦思歸。

白燕

故國飄零事已非。舊時王謝見應稀。月明漢水初無影。雪滿梁園尙未歸。柳絮池塘香入夢。梨花庭院冷

侵衣趙家姊妹多相忌。莫向昭陽殿裏飛。

楊儻驪珠雜錄。常熟時大本賦白燕詩云。春社年年帶雪歸。海棠庭院月爭輝。珠簾十二中間捲。玉剪一雙高下飛。天下公侯誇紫領。國中儔侶尙烏衣。江湖多少閒鷗鷺。宜與同盟伴釣磯。錄呈楊鐵崖。鐵崖亟稱珠簾玉剪之句。袁景文在坐曰。詩雖佳。未盡體物之妙。廉夫不以爲然。景文歸作詩。翌日呈之。鐵崖擊節歎賞。連書數紙。盡散坐客。一時呼爲袁白燕。以此得名。

靜志居詩評。海叟居松江府治東門外。崇禎末。單麻城恂。卽其址構白燕菴。李舍人待問書聯於柱云。春風燕子依然入。東海鰻魚不可尋。相傳孝陵有言。東海走卻大鰻魚。何處尋得爲海叟而發也。

京師歸至丹陽逢侯生大醉

白下西風吹夜涼。五湖秋草著微霜。千家砧杵初淩亂。獨客關山正渺茫。歸去定應殘臘盡。飄零猶幸此身強。丹陽郭裏盈樽酒。且爲侯芭發醉狂。

懷曾彥魯

不見曾公白髮侵。酒杯碁局最關心。年華冉冉情何限。江海悠悠水正深。欲買小舟隨雁去。便從幽壑聽龍吟。聞其恆往來龍井。明年春滿長洲苑。拄杖穿花處處尋。

題吳王內涼圖

微月斜侵響屨廊。芙蓉清氣滿金塘。鴛鴦只傍闌干宿。也愛君王水殿涼。

日莫卽事

茅屋秋來破不勝。野雲沙樹自層層。老夫生理今拋廢。日日江潭去採菱。

江上寄書

湖南估客發西津。東入姑蘇花正春。獨有相思數行字。欲從江海問情人。

贈歌舞女童

漳河女子薦良童。名在先朝樂部中。記得教坊新隊子。江南江北舞春風。

瓜步夜泊

千里長江雨乍晴。江頭燈火夜深明。爲報高樓莫吹笛。故園東望不勝情。

蘇伯衡七首

伯衡字平仲。金華人。明初爲國子學錄。遷學正。被薦擢翰林編修。辭歸。洪武十年。學士宋濂薦以自代。復以疾辭。後爲處州教授。坐表箋誤下吏死。有平仲集十六卷。

田按平仲以古文鳴。宋以濂送平仲還鄉序云。平仲辭章體裁嚴比。姿態橫逸。如春陽被物。或根或莖。或卉或條。或小或大。或圓或偏。各隨其物而暢之。無有同者。又云。司馬溫國公光資治通鑑成一家言。宋之後。元承之。宋有李贛。雖嘗著爲編年。異同

之論皆並存之。蓋不敢當作者之任。元史新修。十四朝之行事。亦頗粲然可觀。有能蒐纂以續司馬之書者。將不在今日乎。平仲學術富而辭章美。其東還也。將操筆削而成百代不刊之典。其爲老輩推重如此。平仲之官學祿也。在丙午七月。吳元年丁未。進學正。見所作國子學同官記。其被薦在洪武元年。庚戌集中有庚戌七月九日晡時。御筆宣喚詩云。元霜溼露動龍香。水殿書題愛晚涼。蠅虱小臣惟感愧。姓名衣被五雲章。明日入見奉天門口號云。玉階俯伏聆天語。金匱抽書亦許陪。又明日詣相府控辭述懷云。只緣多病兼無似。只合山林送此生。蓋引見後授編修。卽以病辭也。其官國子前後五年。胡仲子跋平仲集云。平仲居太學六年。提要疑爲史誤。余詳檢本集。蓋仲子誤加一年。史不誤也。集中又有被留校讎元史。史館雜書詩云。筆削自從尼父後。文章無過馬遷優。坐銷官燭知無補。絲絡翻慚進庶羞。蓋辭官後又被留史館。至明年始得還也。平仲夙懷恬退。連雨雜書詩云。決去胡不早。無營尙盤桓。東齋夕書詩云。偶隨孤鶴行。時見疎鰲度。卽此有餘歡。何況山中去。厥後景濂薦以自代。力辭還山。二十一年。聘主會試。後辭還。尋授處州教授。以表箋忤旨。下獄死。二子恬怡救父。並被刑。覆巢之下。安有完卵。其爲斯人言哉。平仲集十六卷。詩僅一卷。非其所措意。而澤古旣深。風格亦自騫舉。其他著述無聞。集本近亦罕見。余假之江陰繆氏雲在齋。

送宋起居還金華

長揖謝官徒。還歸戒征軸。眷言幽貞廬。覓在仙華麓。就養望旣盈。考槃願亦足。儲清濬昔池。薤荒理舊竹。蘭佩紐春蕤。荷衣製秋綠。沆瀣晨三嘯。彫胡晝九曝。從今猿與鶴。不復怨幽獨。

連雨雜書

江雨殊未已。江風生早寒。今我悄不樂。喟然起長歎。決去苦不早。無營尙盤桓。徒貽父母愁。歲晏衣裳單。

東齋夕書

幽居得自怡。野性方愜素。高枕一酣眠。長廊獨閑步。白日誰云長。青山忽已暮。皓月照前階。涼風滿高樹。偶隨孤鶴行。時見疏螢度。卽此有餘歡。何況山中去。

贈徐季子

百金不惜市梃鞭。兩耳不解聽朱絃。人情如此亦何以。我每見之獨慨然。夫君懷寶起浙右。掉鞅觀光來日邊。夙學人言破萬卷。新製我喜窺幾編。金莖玉露足秋爽。林花澗草爭春妍。紛紛牛毛豈不多。振振麟角爾固專。摛藻詞垣翻舍置。採芹鄉泮仍留連。所好者竽鼓者瑟。猶枘以方鑿以圓。陳平丰姿若冠玉。鄴生辯口如河懸。禮意殷勤日三接。華貫數歷歲九遷。由來利鈍係遭遇。未必愚智殊天淵。樂育菁莪亦已重。況乃桑梓敢不虔。去國不賦北平什。還家徑上東吳船。大材小試吾竊歎。冷官不厭子乃賢。謗予閱世條四十。守官太學垂五年。包羞待問成倚席。畢景兀坐寒無氈。勳業空期螳附驥。俛仰卻笑夔憐蚘。彼哉浮榮勿復道。歸歟樂事言難宣。會稽雲門最幽絕。鑑湖剡水交漪漣。玄猿嘯呼山近屋。白鳥明滅江吞天。雲閒往往得靈藥。月下時時聞采蓮。多暇應爲曲水會。乘閒便作東山眠。村翁溪友總愛客。蕨芽蓴菜不計錢。酒酣更斫銀絲鱸。章就還灑蟬翼牋。並遊只許鐵冠子。同載應懷玉局仙。願言留榻以相待。一曲擬乞君王前。

贈王彥和檢校還北平四首錄二

拜表趨丹闕。承恩宴紫宸。羽儀江左彥。簪紱幕中賓。玉液金盃出。璠筵錦瑟陳。轅門思贊佐。迴轡敢逡巡。
乘傳歷長途。齊封接魯墟。頻年經戰鬪。幾處遂耕鋤。小市尊多酒。貧家飯有魚。重來朝覲日。爲報玉階除。
田按彥和名籍。處州人。與兄鍾。一母同乳而生。鍾字彥中。早卒。劉伯溫爲文以哀之。彥和與修元史。附見明史。趙壩傳。史不詳其仕履。余錄高季迪贈彥和赴檢校北平詩。僅詳其授職耳。今錄平仲詩。復檢平仲文集。有送玉彥和序云。彥和儀觀甚偉。於書無所不讀。弱冠偕其兄彥中。試於鄉。不中。卽棄去。作爲古歌詩雜文。長老咸推讓焉。今春以議禮被徵而起。尋承詔入史局。纂修元史。比史成。北平之命下。高君季迪率朝之搢紳。賦詩以華其行。而余序其簡首。彥和爲宋給事中。信之後。家有槐堂。劉伯溫爲之賦詩云。晉公庭上三槐樹。千載流傳是德符。今日耳孫思繼述。昔年手澤歎荒蕪。當窗欲看屯雲葉。夾徑先栽待雨株。曾見枝頭金粟蕊。秋風吹送上天衢。余於前後史局諸公。無詩可採者。必詳其事蹟。平仲又有夏尙之太史哀辭。序云。我師克燕。拔其知名士赴南京。太史夏君以老病乞歸。會遣使分道搜訪元史。乃強君如江廣。君辭不得命。乃行。行至番禺以疾卒。君名以忠。字尙之。袁州人。據此。則夏君又續修庚申君史。分道探訪十二人之一人矣。

送蔡思賢參政使蜀

清晨旌節三川去。今日車書萬里同。燕餞都亭來詔使。停驂鄉井訪鄰翁。峯經迴雁邊聲靜。峽入嘒猿樹影空。昭烈祠西諸葛廟。秦州城北隗囂宮。神交露立蒼茫際。長嘯風生感慨中。毛伯昔聞周上介。隨何今見漢明公。布宣德意相如最。囊括山川太史工。河隴從茲兵不構。轅轅此去路相通。庭充橘柚陳方物。歌

聽巴渝識土風，最是多情江漢水。直隨歸楫到江東。

田按思賢名哲。武昌人。丙午夏主明昇。遣使來聘。太祖使思賢報聘。論曰。蜀使者多飾浮詞。誇大其國。徒取人不信。汝至蜀。愼無效此。其啓行也。同朝多有贈詩。詹同文詩云。東吳霖雨佐。西蜀將星明。水落黃牛廟。雲開白帝城。邦交修玉帛。賓禮會簪纓。陸賈無裝贈。揚雄有賦名。詞源流峽水。詩筆發天聲。邛竹臨風看。巴船載雪行。錦官談舊俗。金節促歸程。聖主龍顏望。慈親白髮生。鳳池邀閣老。馬首出郊迎。

童冀二首

冀字中州。金華人。洪武丙辰。徵入書館。出爲全州教官。遷湖州教授。調北平。坐罪死。有金華、南行、雪川、北遊等集。合爲尙綱齋集五卷。

四庫總目。童冀在明初。與宋濂、張羽、姚廣孝相唱和。詞意清剛。不染元季綺靡之習。雖名不甚著。而在一時作者之中。固亦足相羽翼。

胡翰仲子集。陶徵士高節。非晉宋人比。故世慕之。韋應物之擬作。蘇子瞻之和篇。往往不絕。中州是集。蓋兼取二家。而寤寐乎柴桑栗里之間。可謂好之篤而思之精。

田按中州金華城川十詠序云。洪武丙辰冬。忝徵至京。明年而職教全州。泝大江西上五千里。是嘗爲全州教官矣。集中零陵水車行。贈丹崖隱者等詩。皆此時作也。次衍公約看杏花詩云。往年爲客上湘水。萬里不異僧行腳。東還蒼雪又十年。日夜思歸歎蕭索。蓋官湖州教授者最久。故云。蒼雪十年也。張來儀爲中州題畫詩云。吳興博士今鄭虔。故山未歸雪滿巔。今年召對席屢前。蒙恩親賜水衡錢。蓋職教湖州時。曾朝京。賜錢遣歸也。集中擬古詩云。我生七九年。始識廣莫風。則遷北平教授時。年

已六十三矣。中州前和陶詩。胡仲子言其後。錢牧齋云。蘇平仲書其後。余檢平仲集。無此跋。疑牧齋記誤也。後和陶詩。獨菴少師跋云。中州才力老成。學問淹貫。其和詩如繭抽泉決。略不見其艱窘。又奉答中州詩云。金華先生老而逸。欲作山中看花客。寄來長律冰雪清。往往丁寧看花約。深致推挹。金華明初作家林立。往往以古文擅長。若中州之詩。與數子角。立於壇坫之間。當亦不多讓也。

讀山海經

西極有玄圃。東溟聞丹邱。駕言往從之。道遠孰我儔。神仙不可見。弱水無安流。不如返故居。何事空遠遊。人生無百年。口腹累甘旨。寧知園邱上。乃有人不死。赤泉亦甃飯。生草信不履。寡欲可長年。大藥何足恃。

申屠衡二首

衡字仲權。大梁人。徙居長洲。洪武三年。授翰林院修撰。謫濠。有扣角集。

楊維禎西湖竹枝集。仲權少貧。恥爲商賈胥吏之習。銳志經史。善屬文。然爲時經生。而兼工詩翰。度越流輩。時論難之。其擬詞云。青鎖春閨漏點遲。博山香燼翠煙微。隔簾誰撼金鈴響。知是花閒燕子歸。可以列才子之林矣。

田按仲權鐵崖弟子。洪武三年被徵。草喻蜀文稱旨。授翰林院修撰。以病免。旋謫濠。作爲詩歌。號扣角集。貝廷璠稱其大篇短章。和平古淡。無哀傷怨懟之辭。庶幾知命者。詩沿鐵體。流傳不多。

西湖竹枝辭

白苧衫兒雙鬢了。望湖樓子是儂家。紅船撐入柳陰去。買得雙頭茉莉花。

春去春來愁別離。淡妝濃抹妬西施。只今五斗青螺黛。留待郎歸卻畫眉。

張昌一首

昌字思廣。臨汾人。洪武初。官國子助教。

田按思廣與貝廷瑀。趙本初。錢子予。劉子憲。同官。國學推爲一時之選。其罷助教歸也。廷瑀作文贈其行。稱思廣學足以相資。言足以相發。暇則與同輩出白下門。登鳳皇臺。倡和成什。皆推思廣爲冠。惜詩不多傳。不足見所長也。

送李廷芳應察公辟

太行山下陣雲高。破賊先登氣自豪。全晉無人居險要。西秦有客度洪濤。關河形勢歸吟橐。天地經綸入戰韜。知己柱臣今郭李。功名咫尺冠諸曹。

鮑穎一首

穎字尙裝。歙人。明初以薦授博士。應典籤。遷翰林院編修。擢修撰。出爲耀州同知。坐罪死。

田按尙裝以詞臣扈從鍾山。帝御擁翠亭。給筆札賦詩。時同賦者朱升。張以甯。秦裕伯。單友中。李某。冠道人也。楓林翠屏。有集行世。餘者無詩可採。余於程篁墩新安文獻志。獲尙裝詩一篇。尙裝出知耀州。高季迪賦詩送行云。鑾坡初罷直。西去惜離羣。載筆唐供奉。褰帷漢使君。濁流河驛雨。高樹嶽祠雲。公暇應懷古。登臨賦夕曛。尙裝政績頗有可述。死非其罪。唐梧岡有文紀之。

書師山先生所題黃山崖石後

蒼崖百尺與雲齊。徵士重來爲品題。姓字一時通漢史。文章千載並浯溪。春深莫遣莓苔沒。日煖應添紫翠迷。猶憶匡廬當日事。短檠山雨五更雞。

王立中四首

立中字彥強。長洲人。以蔭授開化尉。元末知嘉定州。遷松江知府。吳元年歸附。攝松江知府。有稗齋、寓齋、辨隱、三集二十卷。

西湖竹枝集。彥強少年傲達凌波物。晚刻節風行。能以門蔭公子爭秀於作者之林。

田按實錄。吳元年。大將軍徐達攻蘇州。遣元帥楊福參謀費敬直。諭松江府守臣王立中。以城降。達令立中就攝府事。既而上命荀玉珍代之。高季迪送王太守遷雲間詩云。男屠豬羊女釀酒。共禱神祠留太守。太守今年遷大州。除書已下誰能留。兩州相去無百里。失君應愁得君喜。安得如君數十人。一時盡福東南民。又有送王邑長彥強詩云。雨昏沙激兼葭溼。離人暮逐江鴻集。田家迥首隔村遙。煙路逶迤一帆入。縣齋明日寫秋吟。古城高樹清砧急。彥強生三子。璉字汝器。璉字汝玉。璉字汝嘉。璉吏部主事。璉通官翰林。璉最顯。

西湖竹枝詞

孤山梅花開雪中。恰似阿儂冰雪容。不學畫橋南畔柳。春來容易嫁東風。
湖山堂前密雨飛。蘇公隄上行人稀。喚郎扁舟早回去。春泥日晚汗郎衣。
絕句

春波橋頭柳似煙。越王城郭在西邊。我家遠屋皆春水。盡日鴛鴦隨釣船。
梅粉凝嬌不肯添。晚雲籠暝壓重檐。江南可是春寒甚。十日東風不捲簾。

林公慶一首

公慶字孟善。處州人。明初官翰林。出爲松江知府。

長沙

定王臺上關中土。西望長安多白雲。賈誼才高空有賦。河間博雅更無聞。

張率一首

率字孟循。廣信人。吳元年。徵知嘉定州。有張嘉定集。

錢塘懷古

南渡諸陵玉柳灰。錢塘孤塔是幽臺。石麟久向雲根沒。金雁何曾海上回。掘漢赤眉因世亂。賓周白馬自天來。沛中王氣非陵寢。徒使遺民過客哀。

田按楊瓊真伽掘宋諸陵。哀帝后遺骨。瘞於杭之故宮。築浮圖以壓之。號曰鎮南。陳剛中鳳凰山詩云。浮圖百尺聳亭亭。落日鴉鳴野蔓青。錢塘懷古詩云。劫火不燒楊瓊塔。怒風還激伍胥潮。孟循此詩。與二作同一酸楚。陳霆兩山墨談云。予聞楊禿所營浮圖。凡三經雷震。最後乃焚其金囊之尖頂。若瓠壺者。考鎮南之跡。元人謂在杭之興元寺。寺故宋大內也。今杭之鳳山門外。雖諸寺俱存。然不知何者爲興元。意者國初修復城隍之際。有識者惡之。特剗去之耶。

包尼授一首

尼授一名聖字師聖江陰人洪武初以明經辟授岳州同知有鶴洲遺臺

田按水樂中朱紹輯高季迪楊孟載與師聖詩爲三先生集師聖詩不逮高楊遠甚紹爲師聖外孫欲私其外祖耳

登岳陽樓

江通巴子三千里雲鎖湘娥十二鬟爲語遊人莫吹笛潛龍淵在月波灣

涂穎三首

穎字叔良進賢人明初授中書典籤遷太常博士

田按黃庸之遊金陵與叔良及朱文昭倡和文昭詩不可得見叔良七言斷句頗有風致

題山水圖

憶昔灤陽八月歸北風吹雪灑秋衣槍竿嶺上停車望萬木蕭蕭落葉飛

上京次貢待制韻

竹宮窅窅秋風晚芸閣沈沈晝漏稀獨有蕃僧承詔寵紅衣白馬退朝歸

閣山雜詠

露盤直瀉上池水玉桂高搖碧落煙雁岩匡廬甲天下無人來看第三泉

朱逢吉一首

逢吉字以貞。崇德人。洪武中。官大理寺丞。

題雲林畫

昔年來看墨池鵝。風雨扁舟載酒過。一自春歸清閣闕。幾番蛛網落花多。

金綱一首

綱字子尙。嘉興人。元季舉鄉試。洪武初。知蘇州府。以請減賦額賜死。

小集南湖分韻得猶字

妖狐叫夜澤。機槍照神州。大地無完郭。人血當川流。四塞失危阻。況乃此平疇。林垌盡野火。園榭爲荒邱。奔竄竟何所。進退徒夷猶。不有良守牧。何以得依劉。仰面見明月。清光似君侯。旣照我心曲。還慰我離憂。

涂幾一首

幾字守約。又字孟規。宜黃人。有涂子類彙十卷。

戎王出獵圖

九月遼陽草正黃。天山飛兔白如霜。曉騰已合三軍勢。猛銳猶思百戰場。金鼎割鮮供上將。玉甌和血飲名王。燕支小隊穹廬出。也向天邊獵雁行。

鄒矩一首

矩字元方。宜黃人。洪武初。以儒士薦。授南城訓導。有集。

雲關嶺

朝從雲關遊。暮向雲關宿。仙人駕雲車。遺我雙白鹿。誰吹紫鸞笙。清響在林谷。

吳彤二首

彤字文明。臨川人。元進士。除贛州錄事。明初以薦授國子博士。同知嚴州。終北平按察副使。

峽口晚泊

翠壁隱殘照。滄洲生夕陰。鷗鳥忽飛去。幽幽春水深。
日落潭水綠。松閒聞子規。征途一萬里。江月每相隨。

明詩紀事卷十四

甲籤

徐一夔二首

一夔字大章，天台人。徙嘉興。元末建寧教授。洪武二年，徵修禮書。三年書成，授杭州教授。六年與修日歷書成，將授翰林院官，以疾辭，賜文綺遣歸。有始豐類稿。

至正庚辛倡和集補傳。大章博學善屬文。危太僕在元時嘗言於朝，授建寧路教授。元末避兵於郡之白苧里，有屋三四楹，窗外有大柞，因作獨柞軒記以見志。錢塘潘時雍題一詩曰：蕭洒幽軒水面開，軒前老樹倚雲栽。閒來扶杖過三市，醉後支頤看百回。風雨欲隨龍化去，雲霄常聽鶴飛來。結鄰擬共榮枯事，遮莫人知是散材。

田按：明初以考禮徵者，如楊維禎、王翰、張宣、朱右、魯淵、錢宰、林弼、劉儼、張翥、陳世昌輩，不堪枚舉。其見於明集禮者，僅徐一夔、梁寅、劉子、周子諒、胡行簡、劉宗弼、董彝、蔡深、滕公瓊、曾魯十人。此外如高季迪、舒徵士、考禮畢歸四明詩云：寄語關門吏，休輕尚布衣。叔孫聊應詔，周黨竟辭歸。赤日京塵遠，蒼煙海樹微。送君還自歎，老卻故山薇。徵士不能舉其名，蓋亦應詔考禮畢辭歸者也。劉仲修清江集有秣陵述懷詩云：誤蒙曲臺召，秉筆從諸公。是仲修亦以考禮徵矣。曾得之以修元史畢留禮局，高季迪送徐大年歸嚴陵序云：大年被召與修元史，書成以老乞還。會春官議修五禮，復奏留之。其書又成，有司具禮傳送歸。是大年亦以修史留禮局者。集禮何以不列大年名，豈大年所修五禮，又別自成書歟。梁孟敬贈徐大章序云：吳元年丁未歲，寅

以召徵至都。四方之士翕然雲集。是時置三局。一律局。舊官之陳於憲章者居之。二禮局。宿儒之通於古制者居之。三諧局。俊才之優於文辭者居之。明史云。太祖首定天下。他務未遑。首開禮樂二局。廣徵宿學書儒。分局討究。是禮局之外。又有樂局。厥後集禮書成。末附鍾律雅樂俗樂三事。始爲合併耳。又謝密庵送朱伯賢考禮序云。皇帝混一初元。命中書暨翰林太常。率諸儒定擬三禮。明年再命集儀禮樂。又明年。徧徵在野道德文章之士。相與攷定之。蓋自吳元年。至洪武三年。無歲不詔諸儒攷禮。三年九月集禮成。特以大章等十人竣事耳。大章爲王子充所薦。續修元史。力辭。其報子充書。深明史法。爲世所稱。始豐稿十四卷。獨缺詩。今所錄者。皆散見於他選本者也。

訪圯法師宿夕佳樓詩

寓縣俄多難。湖山亦被兵。名藍俱泯滅。別構獨崢嶸。翰墨看前輩。登臨愧後生。嚴城圍列嶂。半檻出澄泓。直篠侵檐上。織蘿附牖縈。倚闌雲鳥度。極目鏡天平。日夕景逾好。秋高思轉清。殘陽樹間歿。薄靄水邊橫。紫翠霏微合。丹鉛點染成。茅津有漁唱。麥嶺少人行。暝色松門動。寒颯竹嶼鳴。疏鐘度餘響。遠火露青熒。仙梵微微出。爐煙裊裊輕。山盤堆露實。石鼎泛雲英。洗濯塵凡近。皈依誓願精。行當陪竺士。聽法破無明。

題徐良夫遂幽軒

臨風一讀遂幽篇。鄧尉穹窿在眼前。愧我未安三畝宅。思君欲泛五湖船。春明載酒穿花隴。日暮扶藜看稻田。多少長安軒冕貴。枉勞魂夢到林泉。

劉承直二首

樵。承直字宗弼。贛州人。元進士。明初被薦。授國子博士。遷司業。出爲浙江僉事。引疾歸。自稱崆峒雪。

田按詩綜云。承直字宗弼。以字行。考之他書。無云承直以字行者。洪武二年。召修禮書者。有劉宗弼。疑別自一人。實錄吳元年。定國子學官。升博士劉承直爲司業。既書其名矣。無緣前後互歧。復以字行。王子充書宗弼詩後云。宗弼善於詩。而於選詩尤工。蓋出入鮑謝。而闡曹劉之城矣。又云。君以文學起家。以政事名世。蓋本末兼該者。惜集不傳。

同俞自安泛舟南湖寄龔所立

高秋留別墅。亭午泛寒流。未結巢由社。遠同李郭舟。波光迎日動。雲氣挾山浮。爲問乘槎客。何時賦遠遊。

采石蛾眉亭

昔從淮海泛歸舟。曾爲蛾眉十日留。翠袖雁行歌子夜。玉壺鯨飲醉清秋。江山有待仍青眼。歲月無情易白頭。滿目閒愁懷李謝。數聲漁唱起滄洲。

周子諒一首

子諒名愷。以字行。廬陵人。洪武二年。徵修禮書。書成授官。四年中進士。授工部主事。

田按子諒詩。見劉仔肩雅頌正音。纏綿溫麗。惜不多傳。

白紵歌

井梧墜葉聲如雨。輓轡夜靜莎雞語。西里佳人怨薄寒。惆悵燈前歌白紵。白紵新時白如霜。象床開合秋

水光製成只恐香塵汚。衣著偏宜九夏涼。西風乍入羅幃裏。數點清塵不禁洗。競開篋笥試新紉。舊服拋捐那復理。嗟爾白紵怨勿深。憐新棄舊他人心。願將貞白永相保。今年卷卻明年好。

林弼八首

弼改名唐臣。以禁國號名氏。復名弼。字元凱。龍溪人。元進士。漳州路知事。洪武初。召修禮樂書。授吏部主事。使安南還。改豐城知縣。以事逮至京。從獄中上書。詔釋之。命爲吏部郎中。出爲登州知府。有登州集二十三卷。

列朝詩集。王禕臨漳雜詩云。科名唐進士。道學宋先儒。風流今孰繼。林子亦其徒。注云。林子元凱也。

田按實錄云。元凱登元至正甲午進士第。有文詞。著聲閩浙間。入國朝。與修元史。授考功主事。而諸書又云。以儒士登春官。修禮樂書。余考元史前後兩局。及禮書。無元凱名。續修元史。以洪武三年二月開局。七月書成。纂修禮書。以洪武二年八月始事。三年九月書成。元凱奉使安南。在三年四月。疑未及書成。以事去。正如操公琰之不得列名元史。魯道原之不得列名集禮耳。宋景濂序元凱使南薰。稱其文辭爾雅。吾友王內翰。品評閩南人物。謂元凱爲巨擘。其爲名輩推重如此。

旅感

驅車秣吾馬。萬里涉遠道。遠道多險艱。行子何草草。晨征夕未息。川陸漫浩浩。行役豺虎區。此身不自保。明當脫塵羈。優游以終老。

用貢泰甫尙書韻贈別吳君濟掾史

東國蒲柳滿江津。杯酒離亭暫別君。春事又隨紅紫老。人生每似燕鴻分。榕亭雨過聞鶯語。桑海天青見鶴羣。東府仙人應握手。三山高處望紅雲。

西村隱居

西村竹樹靜朝暉。萬事閒來總息機。一夜小溪春雨過。半篙新水白鷗飛。草堂築就貧誰寄。彭澤歸來願未違。最憶衡門凝望處。平疇十里豆花肥。

和韓南勝

白鹿山前舊草堂。重來吟鬢已成霜。花城衙放雨初歇。竹寺詩題日正長。水蓴作羹流箸滑。溪魚釀鮓透苞香。野人喜見昇平象。桑柘連陰古戰場。

臨江

柳外樓臺入翠微。水邊簫鼓蕩晴暉。樟江雨漲魚新上。阜閣雲生鶴共飛。諸老尙留詩卷在。此生未逐釣船歸。篷窗吟罷還成醉。蜜酒初香玉筍肥。

覺初上人還永嘉江心寺

江心古寺金焦如。滄波湧出青芙蓉。千歲鶴歸作人語。九淵龍起聽梵書。山屐重尋謝康樂。丹砂試問陶隱居。自是初心得真覺。閒身去去隨樵漁。

題方壺子墨竹

方壺仙子御風還。雲外珊瑚響珮環。吹徹鳳笙山月冷。參差玉管落人間。

題畫

白石青蒲春水生。夕陽毛羽照沙明。戲拈畫筆知何處。柳外池塘艇子輕。

張翥二首

翥一作翼字翔南。建德人。徙居嘉興。元末舉於鄉。明初徵入禮局。告歸。有梓字集。

田按竹垞稱翔南所居有巨梓。徐一夔爲作記。余檢梁孟敬石門集。亦有梓字記云。今天子將卽大位。寅與君同受詔。稽古禮文。則翔南徵入禮局。亦在吳元年矣。

憩景德寺分韻得話字

郭遠樹稍陰。野曠秋始屆。舟迎浦上迅。愠釋林閒快。紺園幾世闢。斷碑何年壞。閣披龍象擁。壁翳天人畫。良朋蔚胥集。僧衲喜出話。談幽貝葉翻。襟散袈裟掛。池深浮菡萏。露晞餘沆瀣。石田際稂稊。秋風偃蒲稗。屢愜清賞延。迫此日西邁。篇什志偕遊。毋云棄菅蒯。

題蔣顥畫翎毛

曾向山中倚玉闌。瓊葩相映碧琅玕。翠禽嘯破香雲夢。別有春風釀早寒。

陳世昌一首

世昌字彥博。錢塘人。元末徵授翰林院編修。明初徵入禮局。授太常博士。有希言集。

田按彥博自號西湖真拙。寓嘉興。作南湖賦。傳誦于時。

亂後南湖詩會得地字

寄家橋李城。情爲姻交繫。時登城上樓。吳山望天際。去年向西湖。重尋煙水契。驀聞兵變起。諜聞若天墜。舉足不敢前。念之心欲碎。兼句難方解。歸舟急偏滯。半道聞鄉信。十言九不是。踉蹌入郭門。閭閻成赤地。到家見妻孥。喜極返涕淚。具言鄰公衙。吏兵掠逾至。男女十九人。幸免毒鋒刺。琴書賴復完。疏狂更容肆。翹首見輝光。恍惚疑夢寐。

孫作二首

作字大雅。以字行。一字次知。江陰人。洪武六年。召修日歷。書成。除翰林院編修。以老病乞外。授太平府教授。入爲國子助教。遷司業。有滄螺集六卷。

澄江詩選。孫次知五言古。實近東坡。七言律絕。氣味淳厚。

田按洪武六年。召修日歷。宋濂。詹同。爲總纂官。樂韶鳳爲催纂官。其與纂修者。吳伯宗。朱右。趙壘。朱廉。徐一夔。徐尊生。孫作。逾年書成。凡一百卷。濂等又言日歷祕天府。人不得見。請仿唐貞觀政要。分輯聖政。自敬天至制蠻夷。凡四十類。名曰皇明寶訓。宣示天下。明人詩派。欲祧宋元而宗唐人。次知取徑蘇黃。錄詩至滄螺。亦空谷之足音也。

謝馬善卿送菜

嘗欣食菜美。自謂肉不過。今晨齒頰間。屢嚙安敢唾。持梁嚼肥鮮。野箴誰當課。使君可憐人。異味諳小大。我本江南樵。酸寒羹不和。空腸轉藜莧。糲粟連糠粃。雨韭春割苗。霜菘秋釘座。羊臠釀旨蓄。蒲歇雜細剉。芋魁掘地底。菱首洗泥科。木魚三百頭。竹筍一萬箇。朝湘出山廚。夕煮吹煙銼。堆盤青黃見。入口生澁奈。以茲媚盤飧。頗復如君作。探之諒有時。蒸或躬自佐。白鹽點葱橙。紅椒羅白磨。蔗錫質劑調。醞醑芳辛破。香飯炊屢熟。宿酒醒方餓。鵝掌推不受。鼈裙空欲蛻。饋案連十罌。飽食深自荷。霜根咀寒齋。三歎論奇貨。米壺奪仙廚。適口騰軒簸。四海一東坡。拙謫常坎坳。參軍半畝菜。詩句劇嘲賀。我慙不償一。造物知何那。抱甕力不任。負鋤筋苦墮。亦欲賦歸田。自種百畝粳。傳君作菜法。華蕘旋封裹。食勤不愧天。日晏從高臥。

酬蔣逸人連日觀花之會

照坐金沙笛裏開。青春兩度爲花來。紅妝初見三千指。錦繡重添一萬堆。細雨流霞移曲檻。東風落日坐平臺。深紅淺白俱情稱。醉後題詩記此迴。

瞿莊二首

莊字敬孚。常熟人。洪武初。以薦授翰林典簿。與修正韻。尋遷禮部員外郎。擢福建右參政。轉左參政。

圖書出甯越門二里曰橫山。迤西爲南臺山。崇阜屹立。俯瞰巨潭。閩王無諸廟在焉。廟循漢制。王西坐。夫人東坐。洪武十年。布政使葉茂禱雨有應。以聞。中書下禮官議。從神故封。稱漢閩越王之神。右參政瞿莊爲文刻石。系以詩曰。炎荒之隅。閩海濱。赫燦照耀。光郁分。維王奕葉。神禹孫。首驅虎豹。勸荆榛。殿此荒服。保黎民。斡旋機軸。轉化鈞。謳歌來歸。赤帝尊。鐵騎汗血。趨崑崙。手扶烈日。開冥昏。彤弓竣矢。昭殊勳。草木衣被。生陽春。漸摩風教。俗以淳。秀民挺拔。宣人文。甘棠蔽葑。森若雲。翼翼遺廟。今尙存。歲時報祀。羅酒樽。手薦蕙鬱。香苾芬。翕張造化。參乾坤。神靈赫若。搏桑暉。

田按洪武八年二月。正韻成。凡十六卷。纂修者。侍講學士樂韶鳳。宋濂。待制王僕。修撰李叔允。編修朱右。趙壚。朱廉。典簿鄒孟達。典籍孫賈。答祿與權。敬孚與焉。其書大旨。斥沈約爲吳音。一以中原之韻。更正其失。以古來相傳之二百六部。併爲七十有六。頗爲通人所譏。李賓之云。國初顧祿爲宮詞。有以爲言者。朝廷欲治之。及觀其詩集。乃用洪武正韻。遂釋之。時此書初出。亟欲行之故也。然終明之世。亦鮮有違之者。敬孚詩頗有風致。宋景濂稱其文學蔚茂。應制諸作。率皆稱旨。

秀野軒圖

高士閒門日日開。遠山如髮水如苔。幾時脫卻塵中鞅。布襪青鞋屢往來。

題慧麓秋晴圖

清遊嘗飲惠山泉。客裏披圖思惘然。尙憶信安祠外柳。蕭條猶帶泫隄煙。

趙攜謙一首

攜謙名謙。一名古則。餘姚人。洪武初。徵修正韻。出爲中都國子監典簿。罷歸。尋以薦授瓊山教諭。有考古餘事。

鄭曉今言趙古則搆謙餘姚人洪武初徵修正韻衆以謙年少黜爲中都國子監典簿同官論事不直罷歸築考古臺述六書之旨注聲音文字通及易學提綱諸書三百餘卷大臣薦召爲瓊山教諭進所著書不報還瓊山初謙來京宋濂遣子仲珩受業謙歸仲珩校正韻多用其說謙六書之學最精既沒門人柴廣敬以聲音文字通進學書者心好之莫得而見也

田按孝陵徵修禮書敕中書省云今天下郡縣舉素志高潔博通古今練達時宜之士年四十以上者禮送至京其年過五十未及四十非深知經術者勿遣搆謙應召時年二十八當事者以議論不合借年少斥去殆授此制也余謂搆謙尼類買生遇榮司馬搆謙沒後長陵修永樂大典門人柴欽進言其師所撰聲音文字通當採錄奉命馳傳卽其家取之此何異長卿之封禪書也明初之善書者朱孟辨之篆塚趙搆謙之墨窗最爲韻事董良用題篆塚云華亭朱茂才好古喜欲顛一掃世俗書習篆忘食眠秦望井之罾碧落策新泉小者案間列大者屋壁懸平生囊橐費多充買碑錢功深學既精齒壯志逾堅池魚染皆黑鐵硯磨將穿擧揚累萬番期差古人肩師法正在茲什襲比躡筌孫樵文自祭智永筆忍捐嵯峨細林山函之瘞其巖聚土封若堂錢石表爲阡寶劍賈胡發玉柙蔓草纏何如篆塚光夜映列星躔管時敏賦墨窗云君居於越文獻邦家藏金石書滿窗磨穿青州老未已萬斛巨鼎嚙能扛吳興宗人已物故浙河東西誰獨步君今有志繼絕學砥柱中流見孤注剡溪百番冰雪光元霞一斗松煤香滿堂賓客看揮灑風雨颯颯龍鸞翔他若滕用亨之篆書王正仲作歌云南陽髯翁學古書雅與秦漢參鐔銖古文奇字盪胸臆豈若俗工譌魯魚自言初習勝國時玉雪左丞吾所師荻莖錐沙指畫腹廿年勤苦求妍姿張藻仲之草書高季迪作歌云昔聞汝祖東吳精醉傳草聖醒而驚汝今能飲不滿杓逸氣欲與相嵒嶮高堂把筆若把壘長綃一拂悲風生陰垂大澤雷雨過響破巨峽波濤傾皆書苑佳話也

聲音文字通成賦詩

文字聲音歎久訛十年辛苦事研磨誰云沈約知音甚未許揚雄識字多魯魚從今堪辨析鼎鼐由昔費

摩挲總憐朋舊微鍾子歸臥雲山看薜蘿

張美和一首

美和名九韶以字行清江人元末累舉不仕洪武三年以薦爲縣學教諭遷國子助教改翰林院編修致仕歸二十七年徵修書傳會選書成遣還有吾樂山房稿

田按美和在成均有師法與聶鉉貝瓊號爲三助洪武二十七年帝觀蔡氏書傳論象緯運行與朱子詩傳不合其他注與鄒陽鄒季友所論有未安者徵天下名儒訂正之兵部尚書唐鐸等舉美和等二十七人帝遣行人馳傳徵至特命學士劉三吾總其事余考實錄所紀與美和同徵者國子監博士致仕錢宰助教致仕靳權教授高讓學正王子謙教諭張士謬俞友仁何原銘傅子裕周惟善訓導唐棊周寬趙信洪初萬鈞王賓謝子方吳子恭儒士解震生熊劍揭軌蕭尚仁蕭子尚王允昇張文翰張思哲宋麟竹垞經義考謂當時修書者尚有許觀景清盧原質戴德彝皆以死建文之難刪去然考今所傳書傳會選舊本尙有胡季安門克新王俊華等十一人而無靳權吳子恭宋麟三人豈實錄所紀但據始事時所徵其後或去或增互有不

歸隱

同耶有明一代官書以此書爲最善顧亭林日知錄亟稱之

歸來江上看青山種柳成陰漸可攀
舊夢任隨流水去此身相伴白雲閒
錦囊書帙收千卷金井丹砂貯
九還留得玉堂揮翰手賸題佳句落人間

錢宰三首

宰字子予。一字伯均。會稽人。元進士。洪武二年徵修禮樂書。授國子助教。十年加博士致仕。二十七年徵修書傳會選。書成遣還。有臨安集六卷。

四庫總目錢宰詩吐辭清拔。寓意高遠。刻意古調。不屑爲豔仄之體。

田按子予仕履各家紀載多有錯誤。列朝詩集。躡駁尤甚。實錄。洪武六年三月。以儒士錢宰爲國子助教。是年命建歷代帝王廟。則子予撰帝王廟樂章。當在此時。牧齋敘次于修書傳之後。誤一實錄。十年三月。國子助教錢宰。以年老乞致仕。上敕云。助教錢宰。學問老成。訓導有方。在學數年。俾有成效。年滿七十。懇辭還鄉。特授文林郎。國子博士致仕。而牧齋云。二十七年。召校書翰林。加博士。賜敕遣歸。誤二。修書傳時。江東諸門酒樓成。賜百官鈔宴其上。宰等賦詩以獻。帝大悅。遣禮部尙書任亨泰。諭諸儒年耄思歸者遣之。宰年最高。請留。而牧齋云。公嘗口占絕句云。四鼓鑿鑿起著衣。午門朝見尙嫌遲。何時得遂田園樂。睡到人間飯熟時。明日文華讌畢。上面諭曰。昨日好詩。朕曷嘗嫌汝。何不改憂字。又曰。朕今放汝去。好放心睡熟矣。公率諸老人拜謝。皆遣還。此詩當賦於官助教之時。而敘次於修書傳之後。必無去留聽便之人。忽賦思歸之句。自相牴牾。誤三。四庫提要云。臨安集中。金陵形勝論末。署洪武二十七年六月。國子博士致仕錢宰進。九月書成。六月已先署博士。此尤早加博士之確證。又云。是致仕卽在奉召之年。修書遣歸。非致仕也。亦小有誤。偶不檢耳。子予詩如畫家淺絳法。雖亦著色。不沒骨幹。

遊西山

西山一何高。有懷在泉石。蕩舟渡西泠。秋水今幾尺。渚花泊孤橈。岸草納雙屐。涼風樹上至。林影下衣碧。羣動方自營。塵機念俱息。邂逅方外人。招邀坐深席。悠然外死生。矧復慨今昔。我客語正深。僕夫勸還役。川明月初至。樹暝山已夕。歸人樵唱來。落日墮西壁。

題崔彥輝雲林小隱

雪上平林半是雲。索居別墅樂閒身。蘋花落日江南唱。楊柳滄灣若下春。隔岸青山連罨畫。當門綠樹接比鄰。外家第宅相過近。內翰風流世有人。

畫魚

綠波春水沒漁家。楊柳青青拂釣槎。三月江南春雨歇。一雙鱸鮓上桃花。

揭軌六首

軌字孟同。臨川人。洪武初。以明經除清河主簿。遷知縣。秩滿歸。復召主江西鄉試。校定書傳會選。書成。賜金歸。有新河集。

田按孟同詩。以律體見長。可肩隨甘彥初。明初臨川宗派如此。洪武二十七年。召定書傳會選。賜宴酒樓。諸儒獻詩。惟孟同詩獨傳。

題孫氏遺墨軒

宣文學士吾季父。草書往往追懷素。玉堂多暇日臨池。方駕長沙美無度。聞道尊公居豫章。亦以能書相頡頏。錦囊長紙霜玉潔。清醉時時臨數行。山陰別後驚捐館。零落狸毫并象管。白鵝池冷綠苔深。銅雀硯寒清露滿。吾廬兵後住江村。玉堂佳帖無一存。卻憶君家文獻在。香奩犀軸付諸昆。

題大長公主林館

主家林館御溝西。楊柳扶疎映舞衣。玉沼萍開魚上躍。繡簾花妥燕低飛。微風翠輦宮中去。淡月霓旌苑外歸。四海昇平當此日。萬年行樂莫相違。

賦得浙江亭送張別駕

銅柱煙銷百粵通。故人千里入閩中。將軍幙府求高適。使者書詞請石洪。野館別時楊柳綠。綵毫吟處荔枝紅。丈夫許與誰知己。須佐雲臺第一功。

秋思

綺窗紅燭淡秋光。鳳帳流蘇滅夕香。機杼隔花閒翠戶。轆轤臨水凍銀床。秋風紫塞書千里。夜月清砧淚數行。望斷金鞍秋又杪。芙蓉零落玉池霜。

宴南市樓

帝城歌舞樂繁華。四海清平正一家。龍虎關河環錦繡。鳳凰樓閣麗煙花。金錢錫宴恩榮異。玉殿傳宣禮數加。冠蓋登臨皆善賦。歌詞只許仲宣誇。詔出金錢送酒壚。綺樓勝會集文儒。江頭魚藻新開宴。苑外鶯花又賜酺。趙女酒翻歌扇溼。燕姬香襲舞裙紆。綉筵莫道知音少。司馬能琴絕代無。

姜南蓉塘詩話。國初於金陵聚寶門外，建輕煙、淡粉、梅妍、柳翠十四樓，以聚四方賓客。觀揭孟同詩可知。國初搢紳宴集，皆用官妓。與唐宋不異。後始有禁耳。永樂中晏鐸金陵元夕詩：花月春風十四樓。今諸樓皆廢。南市樓尚存。

周暉金陵續瑣事：太祖造十六樓，待四方之商賈。士大夫用官妓無禁。宣德二年，大中丞顧公佐始奏革之。國初知縣揭公軌，有宴南市樓詩。當時之盛可知矣。今此樓雖存，不過屠沽市兒之遊樂而已。

靜志居詩話：永樂中蜀人晏振之金陵春夕詩云：花月春江十四樓。十四樓者，來賓、重譯、清江、石城、鶴鳴、醉仙、樂民、集賢、謳歌、鼓腹、輕煙、淡粉、梅妍、柳翠也。姜明叔蓉塘詩話：謂皆在聚寶門外。然中既以清江石城爲名，必不皆在聚寶門矣。周吉父撰金陵瑣事：謂有十六樓在城內者。曰南市。曰北市。在聚寶門外之西者。曰來賓。在聚寶門外之東者。曰重譯。在瓦屑壩者。曰集賢。曰樂民。在西關中街北者。曰鶴鳴。在西關中街南者。曰醉仙。在西關南街者。曰輕煙。曰淡粉。在西關北街者。曰柳翠。曰梅妍。在石城門外者。曰石城。曰謳歌。在清涼門外者。曰清江。曰鼓腹。所載特詳。楊用脩藝林伐山：遺南市北市。陳魯南金陵世紀：遺清江石城。因曲就十四樓之目而誤也。相傳定正蔡傳書成。宴編纂諸臣於醉仙樓上。然揭孟同詩云：詔出金錢送酒壚。綺樓高會集文儒。題曰宴南市樓。則非醉仙明矣。實錄洪武二十七年八月庚寅：新建京都酒樓成。先是以海內太平，思欲與民偕樂。乃命工部作十樓於江東諸門之外，令民設酒肆以接四方賓旅。既又增作五樓。至是皆成。賜百官鈔。宴於醉仙樓。九月癸丑。定正蔡傳書成。賜諸儒宴及鈔。俾馳驛還。是則編纂諸儒先與百官並賜宴者。醉仙樓也。繼以書成賜宴者。南市樓也。蓋酒樓本十六。其一北市樓。建後被焚。此實錄止言增建五樓也。當日諸樓皆有官妓。不獨輕煙、淡粉、梅妍、柳翠爲然。故李公泰叔通集句詩於北市則云：極目亂紅妝。於集賢則云：妙舞向春風。於清江則云：時轉過雲聲。於鼓腹則云：舞破日初斜。於石城則云：翠袖拂塵埃。於來賓則云：煙花象外幽。於鶴鳴則云：白日移歌袖。而孟同詩云：詩寫桃花歌扇底。酒攜楊柳舞樓前。又云：龍虎關河環錦繡。鳳皇樓閣麗煙花。又云：趙女酒翻歌扇溼。燕姬香襲舞裙紆。追憶承平都會之盛。君臣相遇之隆。亦一段佳話也。

明詩紀事卷十五

甲籤

朱同一首

同字大同。休寧人。學士升子。洪武中舉明經。爲徽州教授。復以人才舉。召爲吏部員外郎。擢禮部侍郎。坐事死。有覆瓿集七卷。

四庫總目。覆瓿集有范櫛跋。稱同洪武中。以人才舉爲東宮官。尋進禮部侍郎。而同時范準作雲漢歸隱圖跋。則云。由吏部員外郎。升禮部侍郎。準字平仲。嘗受業於同之父升。與同交至契。所記宜得其實。又明史但載同坐事死。而不著其詳。蔣一葵堯山堂外紀。乃云。同以詞翰受知。宮人多乞書便面。一日御溝有浮尸。帝疑之。遂賜死。其說頗荒唐。未可信也。集凡詩三卷。多元末之作。爽朗有格。文四卷。議論純粹。不愧儒者之言。

田按黃瑜雙槐歲抄。稱大同父升。得六王之奧。生子同。升課之曰。此子後必遭婦人之禍。天兵過徽。高皇帝素知升名。召問。遂預帷幄密議。臨行問所願。欲升踞而泣曰。臣子同。後得全軀而死。臣在地下。亦蒙恩不淺矣。後同仕至禮部侍郎。善詩翰。大被寵遇。禁中畫壁多其題詠。或令題詩。賜宮人。忽御溝中有流屍。上疑之。將殺同。因念允升之請。令其自經。王課精妙。亦至於此。與堯山堂外紀所言。同一不經。今檢覆瓿集。有遭誣得罪賦詩見志云。四十趨朝五十過。典章事業歷研磨。九重日月瞻依久。一代文章制作多。豈有黃金來暮夜。祇愁白髮老風波。歸魂不逐東流水。直上長江訴汨羅。蓋以臧罪見誅也。大同兼長書畫。

詩格高老亦明初一作家。

題畫

老蚪參天勢欲動。古樹錯立交隆嵒。清溪雨過生碧雲。隔岸嵐光入檐重。小亭臨水清且漣。怪石翠溼苔蘚妍。倚欄讀書兩忘言。豈應未了黃庭篇。

散步至楓林

信步尋春不知遠。小逕委蛇繞平巘。雨餘翠滑石磴危。青梅如豆低垂枝。屋上青山壓簷重。風裏幽禽時一弄。主人不歸柴門關。山犬認人自迎送。花落烏啼白日閑。依微機杼鳴林間。徘徊不覺歸來晚。淡黃落日啣空山。

登子陵釣臺有感

清曉扁舟維岸陰。百年幾渡來登臨。遊人仰扳石磴險。飛臺俯瞰滄波深。客星帝座一時事。江水雲山千古心。哲人去矣不可見。擊劍空作秋龍吟。

歸故宅

曲曲清溪來往頻。故園又得見先春。笋穿舍北竹繞屋。梅倚牆頭花笑人。泉石幾家供客眼。江山萬里暗兵塵。由來軒冕多翻覆。澗水松風未是貧。

上江山中卽事

山上青山樓上樓。結樓高下倚林邱。通幽一逕苔蘚滑。壓檐四山空翠流。松梢滴露作疎雨。嵐氣入簷生早秋。我來暫下陳蕃榻。一洗生平今古愁。

至楓林登東山樓有感

樓隱喬林白日長。桂花不斷四時香。山蒸嵐氣作朝雨。竹引水風生晚涼。身在豈應愁計拙。興來時復動詩狂。東山一爲蒼生出。贏得人間話幾場。

上巳日苦雨寄汪彥暉

三月三日苦泥濘。春遊無計令人愁。雲低暮色近垂地。風捲濤聲遙撼樓。青天白日定何所。急雷轟電方未休。最憐桃李花開處。雨橫風狂不自由。

題琴趣軒卷

淨几鑪煙晝靜。小齋花氣春酣。莫作商聲秋調。鶯啼三月江南。

泛舟嚴陵

雨聲徹曉收不住。船頭水高三尺強。只須多買威平酒。中流擊楫歌滄浪。

楊妃上馬圖

錦韉銀鞍映綺羅。開元猶是舊山河。海棠春暖嬌無力。寫向生綃恨轉多。

墨菊寄方山程德明

方山處士別我久。每挹高風晚節香。賴此鵝谿三尺雪。寄君日日作重陽。

竹枝詞二首

郎心恰似江上蓬。昨日南風今北風。妾心恰似七寶塔。南高峯對北高峯。
茜紅裙子縷金紗。多在湖船少在家。黃衣年少不相識。白日敲門來索茶。

鄭潛五首

潛字彥昭。歙人。元季爲泉州路總管。洪武初除寶應。【原缺】……………

初召拜禮部侍郎。以親老辭歸。再徵爲溧陽教諭。有樵海稿。

田按邢子愿云。前代拓帖墨後。微以駱駝油少澤之。其光可鑒。而無印清膠粘氣。文仲送殷孝章之咸陽詩云。故國已消龍虎氣。斷碑猶打駱駝膏。入詩頗新。

花遊曲

館娃宮裏春迷濛。雜花芳菲嬌亞風。油壁香車度花裏。笑解珠纓被春水。水邊小艇忽到門。鱗鱗綠澱金
鵝裙。尤雲帶雨踏歌步。春風喚愁花下暮。流光去去不復來。縹酒且進芙蓉杯。鸚珠串落碧瑛椀。鳳槽聲

催紅玉板。宴遊未終。山日西。柔纖棒硯索新題。風流文采瑤林使。肯數玉人裴十四。雲中分散五雲箋。更賜一曲曉山篇。

六硯齋筆記。至正戊子三月十日。會稽楊維禎。同貞居張伯雨諸人。遊石湖。有侑者瓊英與坐。各爲花遊曲一章。詞情美麗。實一時之盛。莫氏修石湖志。乃以爲穢而去之。文太史徵仲。深爲惋惜。特作蠅頭細書。錄成卷。仍爲補圖。留作山中故實。余謂志乘成於一人之意。修改不常。如此瑰璋之詞。托於志。不若托於太史之寶圖名翰爲不朽。余愛其詞。一一錄之。

田按竹嬾所錄者。楊維禎。顧阿瑛。郭翼。袁華。馬慶。陸仁。秦約。于立。並徵仲竹嬾追和之作。今僅綴鐵崖原唱。及袁文李三詩於文仲之後。鐵崖詩云。三月十日春濛濛。滿江花雨溼東風。美人盈盈煙雨裏。唱徹湖煙與湖水。水天虹女忽當門。午光穿漏海霞裙。美人凌空躡飛步。步上山頭小真臺。華陽老仙海上來。五湖吐納掌中杯。寶山枯禪開茗椀。木鯨吼罷催花板。老仙醉筆石闌西。一片花飛落粉題。蓬萊宮中花報使。花信明朝二十四。老仙更試蜀麻箋。細寫春江花月篇。子英詩云。煙雲撲霧搖空濛。遊絲弱絮縈柔風。木蘭載春石湖裏。手弄瓊英射春水。鐵笛仙人招羨門。鸞旌小隊青霓裙。浚波雙飛動微步。冶情漫憶鴛鴦幕。踏青颺鼓能幾來。便須一飲三千杯。血色葡萄凝水椀。雙袍催徹紫牙板。雲旗縹緲青鳥西。口啣紅巾絨舊題。瓊林宴中探春使。骰子逡巡賜緋四。醉攜翠袖寫銀箋。不數公子花遊篇。徵仲詩云。石湖雨歇山空濛。美人卻扇歌迴風。歌聲宛轉菱花裏。鴛鴦飛來天拍水。當時仙伯醉雲門。酒痕翻汗石榴裙。遺蹤無復芳塵步。湖上空餘昔人墓。昔人既去今人來。千載風流付一杯。雪藕銀絲驚冰椀。蛺蝶穿花逐歌板。夕陽剛在畫橋西。一段春光屬品題。傷心不見催花使。只有黃鸝喚再四。無限春愁誰與箋。仙人會唱紫霞篇。竹嬾詩云。笑倚吳娃唱紫濛。十尋錦纜石湖風。蘭棹雪腕煙花裏。屬玉飛飛雙照水。水晶宮殿花壓門。纖句蹙蹙縷金裙。山腰巧作迴鸞步。真珠雨溼埋香墓。凝眸卻扇花片來。輕紅縹綠浮春杯。玻璃百坂青瑤椀。纓筍廚開矜玉板。海月吐東湖捲西。琵琶重撥潯陽題。春花怕遣蜂作使。狼藉胭脂感數四。緘愁悉付研光箋。勞勞絮絮訴春篇。

漁莊歌

公子漁莊秋氣高。灣灣野水曲塘坳。隔林月出車輪大。照見花間翡翠巢。
金菊粉蕖秋水濱。恰如生色畫屏新。蕩舟直過紅橋去。小隊遊魚不避人。

桂彥良二首

彥良名德稱。以字行。慈溪人。元進士。爲包山書院山長。改平江路教授。洪武初。徵授太子正字。尋爲晉府右傅。改長史。追贈編修。諡敬裕。有清節。清溪春和詠言。山西拄笏。老拙和陶。中都紀行等集。

送田仲茂宰西川

天門傳制拜新除。西入成都萬里餘。江上好風吹去棹。邑中故老候來車。巴園五月收丹橘。丙穴三春饌白魚。卻憶文翁遺化在。何因公暇說詩書。

靜志居詩話。長史以德望重。韻語非其所長。然如巴園五月收丹橘。丙穴三春饌白魚。亦小有風致。吳江史明古爲作傳。稱孝陵嘗詠蝌蚪云。池上看蝌蚪。分明古篆文。命長史續之。應聲曰。惟因藏水底。秦火不能焚。可稱敏絕。

送顧謹中少尹赴荊州

曾讀皇明混一篇。煥如霞錦濯晴川。長才合置鸞坡上。秀句新傳鳳榻前。斗邑爲丞資薄祿。扁舟奉母念

高年艱難自少今成立。未必哦松讓昔賢。

田按謹中皇明混一頌。頗有時名。解大紳云。臣縉近奉內廷。獲觀所御書籍。見其題曰。顧祿詩集二編。此詩秀句新傳。鳳榻前。當卽指此事也。

范準二首

準字平仲。休寧人。洪武中以明經舉爲休寧訓導。擢吳堡知縣。遷工部主事。有齋鬻。悉白。何陋軒。西遊諸臺。

無腳雞有序

山行見田家伏雌無腳鼓翼而行。詢之晨牝也。戒其家烹之。賦此紀異。羣雞唱罷。山月落。一雞峨冠。卻無腳。膈膈膊膊。轉雌聲。乃與雄雞相對鳴。有翎飛不高。無足胡能行。徒爲牝晨禍家庭。羽毛之孽何由生。氣淫運乖非祥禎。德輝之鳥翔千仞。安肯下食共爾相喧爭。

題小畫留別韓文忠二尹

夜來夢到吳塘路。月冷霜寒白雁啼。今日題詩看畫處。隔江山色是淮西。

朱模一首

模字子範。休寧人。官六安州判。洪武三年。捕賊遇害。有白沙行藁二卷。

宿羊舌城

舒蓼皆侯國。春秋用甲兵。晚炊投野店。日落弔荒城。古渡漁燈滅。陰房鬼火明。愁來不成寐。欹枕聽雞鳴。

方時舉三首

時舉初名槐。又名樸。以字行。莆田人。洪武初官興化訓導。有方壺集。

田按閩中有壺山文會。初會九人。宋貴誠、方樸、朱德善、邱伯安、蔡景誠、陳本初、楊元吉、劉晟、陳觀。續會者十三人。陳惟鼎、李蕊、郭完、陳必大、吳元善、方炯、鄭德孚、黃性初、黃安、陳熙、方坦、葉源中、釋清源。月必一會。賦詩彈琴。清談雅歌。以爲樂。余始見福建通志。有方樸等壺山文會集。逮檢鄭王臣莆風清籟集。而其事始詳。凡與會者共二十二人。錢牧齋列朝詩集。稱郭完元末隱于壺山。與方時舉等十二人結社。王臣譏其失考。以閩人若閩事。此固其專長耳。壺山會中詩多雅音。以較十才子詩。不多讓也。時舉有莆陽人物志。福建通志。既錄方樸莆陽人物志二卷。此後又有方時舉莆陽人物志二卷。歧爲二人。誤矣。

普覺堂

普覺有何好。秋來事事幽。風檐落柏子。榕葉覆溪舟。隱几山當戶。翻經月到樓。誰爲姑射牧。茅屋隔滄洲。

和陳廷中避地南泉

思君時復上寒岩。十月林巒尙翠嵐。溪竹裁成綠玉杖。石橋拄過白雲菴。客懷最與山僧似。時事難從野叟談。卻憶當年杜陵老。卜居正近浣花潭。

會日懷雪巢石溪二君臥病

年來自覺親朋少。今日相逢白髮多。風雨棲遲一樽酒。令人長憶病維摩。

陳觀一首

觀字莒峯。莆田人。洪武初以薦官陝西右參政。有輟耕吟稿。

鄭王臣蘭陔詩話。莒峯應召至京朝謁。太祖顧問曰。彼長而質者何人。莒峯出對。試以王猛捫虱論。稱旨。授陝西右參政。在官以清介聞。朱竹垞云。洪永間有四陳觀。獨不及莒峯。偶失考耳。莒峯少預靈山文會。詩有唐人風致。

與方履道會陳岩紫雲蘭。若是日方用晦釋清源。諸人有事不赴。並懷之。

佳侶往何所。遠渡溪之澗。齊攀仙巖雲。共宿瓊樓雨。素琴奏梅花。清歌發白紵。獨懷山下人。無由共芳醕。

劉晟一首

晟字性存。莆田人。洪武中以薦官南陽知縣。

田按性存入靈山文會。詩最傑出。惜不多見。

真率會

炎靈運元化。衣冠集芳辰。皤皤斯達尊。濟濟凡七人。琴瑟既在御。豆登亦復陳。旨酒式燕樂。太羹薄肥珍。登歌間行葦。稱觴壽千春。德將諒無醉。既醉不失真。陶然宇宙間。蟪蛄焉足論。光風泛蘭蕙。好鳥鳴及晨。江漢日云遠。道義日益親。覽圖百載下。安得風再淳。願言繼遺響。遙睇洛水濱。

賀守約二首

守約字禮齋。永新人。明初薦授永新教諭。改光山。有禮齋詩集。

永新學署有感

一曲鏡湖在。衣冠六百年。家貧無負郭。世守有殘篇。竹下紐蘭佩。雲根漱菊泉。相期歲寒在。梅石共清堅。

遊禾山龍門溪

秋山蒼翠接空冥。七十一峯如畫屏。雁塔遺基藤蔓紫。龍門題墨薜花青。幾從石上看棋局。仍向雲間劇茯苓。鶴隴幸容孤迹住。天書何事又巖扃。

龍玉泉一首

玉泉字雲壑。永新人。明初舉賢良方正。官知縣。

題南臺

秋松落層陰。秋水蕩寒碧。一曲紫瑤琴。空山暮天寂。

文魯麟一首

魯麟字東魯。永新人。元至正丁亥鄉舉。洪武初舉賢良。官永新學正。有筍峯集。

七馬圖爲貢叔英題

吾聞渥注水接銀潢碧。產此八駿無人識。當時周滿欣得之。要令四海皆轍迹。就中一匹真奇絕。從駕不受黃金羈。一朝逸去收不得。飄忽雲霄攢四蹄。其餘七匹皆神駿。一一具有真龍性。五馬渡江一馬隨。齧草飲泉筋骨勁。一馬振鬣當風前。目光夾鏡尻雖圓。攬身正面如人立。奚奴敏捷那能鞭。玉堂學士蕭夫子。筆端獵獵霜風起。金鑿草制有餘閒。寫此驍騰世無比。中郎愛馬仍愛圖。搗來一見爲嗟吁。致之座右重珍惜。芸窗把玩時卷舒。我今作詩爲題品。不見驂騑空見影。安得若此毛骨千萬羣。埽空沙漠清龍庭。

杜隰一首

隰字宗原。松江人。洪武初。官贊禮郎。使緬還。擢禮科給事中。有雙清集十卷。

王昶青浦詩傳。明初南緬不庭。宗原奉詔撫之。緬人馳金帛而求題詠者。車滿郵亭。歸而達諸朝。太祖爲製御序。

懷古

吾愛陶彭澤。蕭然遺世姿。高情託雲鳥。苦節寄東籬。饑驅時出戶。酌酒卽成詩。五男俱用晦。三徑獨逶迤。門種先生柳。臥與羲皇期。斯人俚已矣。清風良在茲。

任原一首

原字本立。休寧人。明初以武功歷官至顯武將軍。雄峯翼管軍萬戶。有集。

田按明初休寧文士。以武功顯者。有任本立原。俞子茂榮。子茂鎮禾川。有威惠。其平符溪凱旋。馬上作云。挈壺歡遊民連野。策

馬歸來雪滿身。雲陽李祁和之。且爲之序云。禾川有符溪者。旣服復叛。公破其寨。縛其渠魁。誅黨惡數十人。平民縱遣還舍。豬羊雞犬。悉令認辨給還。民大欣悅。公旣還府。賓佐咸集。獨留儒學士十數人。列燭張宴。坐中口占馬上所得詩。衆賓咸和。乃輯成卷。僕從衆賓之後。和之曰。溪橋石路不生塵。幕下初聞號令新。士卒銜枚衝夜雪。將軍橫槊賦陽春。已擒渠惡從梟首。未死么麼許乞身。德意已孚威力著。愧無椽筆紀蒼珉。子茂文采不及本立。因錄本立詩。附見其事於此。

送舒從事還南海

老逢離別倍傷情。一騎臨秋復遠行。客路驚心孤雁影。家林入夢斷猿聲。珠崖落日天低海。銅柱雲寒雨過城。翻憶舊遊多感慨。獨嗟書劍誤儒生。

王善慶一首

善慶字士積。歙人。有秋齋野趣。

過週流寺

雲埋殿閣週流寺。春水衝撞復到山。僧衲挂枝庭樹老。禪床堵石洞雲閒。久無山鬼吹燈火。時有淵龍護法壇。我亦長歌來徙倚。滿襟清思隔塵寰。

吳舜舉一首

舜舉字士源。歙人。洪武初以耆儒舉。授徽州教授。有石溪吟藁。

寄淳安徐大年

歙南出去一百里。秋盡春來信不聞。昔日登樓同聽雨。今年幽谷飽看雲。管寧豈是遼東客。伯樂曾空冀北羣。安得俗塵長謝卻。挾書林下共朝曛。

黃思永一首

思永莆田人。洪武中官福安教諭。

老圃書堂

瓜地書廬僻。柴門闕碧流。波光搖席冷。山色入簾幽。琴撫聽黃鵠。樽開近白鷗。芳鄰有如此。宜爾賦歸休。

蔡景一首

景字元昶。江陰人。徙居松江。

贈略道權上人

客邊相見雪盈頭。蓬底談詩紀昔遊。百里雲山黃葉寺。十年鷗鷺白蘋洲。雨花風暝香生座。梵唄風清月滿樓。昨夜南湖秋水漲。浩歌又上木蘭舟。

柯欽一首

欽字叔敬。莆田人。洪武中官興化訓導。有采薇集。

蘭陵詩話。欽自號深隱老人。詩源出晚唐。其七言如空城落木羣鴉噪。斜日西風瘦馬行。亦高唱也。

覽岡仲旅吟藁有感

故里歸來夢寐空。客懷偏在苦吟中。三年枕畔梧桐雨。一夜江頭杜宇風。日暮荒阡松樹綠。春深廢圃海棠紅。朱甍碧瓦輸時世。粉蝶差差過屋東。

伍衡一首

衡字時敏。莆田人。洪武中官增城知縣。

蘭陔詩話。前輩稱時敏歌行。麗縵奇崛。有溫、李遺意。近體充瞻英美。惜其集散佚不傳。

和連汝信

習靜幽齋絕外思。景清情曠兩相宜。風薰花氣晴侵夢。雨漱溪聲寒入詩。魚近碧闌人狎見。鹿眠香芷客來疑。時時懸榻需君至。此興旁人未必知。

王子魯一首

子魯自號笙鶴道人。高唐人。洪武中官河間教授。

馬灣曉月

古河一曲環爵隄。天光滉漾浮玻瓈。漁翁待旦掉船去。白鷗飛過黃蘆西。

黃孟良一首

孟良名德貴。以字行。莆田人。洪武中。徵辟授松陽主簿。擢知縣。有老圃居士詩稿二卷。

九鯉湖

人已昇仙鯉化龍。伊誰湖上構仙宮。石遺丹鼎潺湲裏。煙鎖樓臺縹緲中。青鳥去來猶夜月。碧桃開落自春風。此行非爲邯鄲夢。擬向橋頭問石公。

蘭陔詩話。孟良洪武三年被徵。以不識字辭。仇家上其九鯉湖詩。械繫至京。太祖覽詩稱善。即日除官。亦云厚幸。後竟坐事謫。

余師孔二首

師孔字愚軒。莆田人。洪武中。官興化訓導。有文安集二卷。

山居偶興

結屋深山中。山深四時樂。幽居不記年。只看花開落。扶筇來石室。空谷絕人行。不辨入山路。惟聞啼鳥聲。

徐松一首

松字喬年。上虞人。洪武中。福建按察僉事。

擬孟浩然永嘉上浦館逢張八子容

君懷往事對酒話多時。荒館天涯夢。殘燈醉後詩。沙城臨海國。人語雜蠻夷。共歎浮蹤遠。相看但莫悲。

彭友信一首

友信字以實。攸縣人。洪武初貢生。召對稱旨。授北平布政使。有方伯集。

宋丞相文文山三月三日獄中遺墨

山雲寒海舟覆。六載孤臣老幽獄。東風颯鳩三月三。五陵望斷春蕪綠。長帆昔挂秦淮船。手持一柱擎天。閒關嶺海血灑檄。回首家國如飛煙。六宮粉黛黃沙裏。漢火無光吹不起。全軀肯學褚淵生。嚼舌甘泉。卿死落花上。已風雨時。展卷如對麟鳳姿。再拜酌公金屈卮。有口不讀蘭亭詩。

王璉二首

璉字汝器。長洲人。立中子。洪武中吏部主事。

田按洪武時有兩王璉。一字汝器。長洲人。一字宗器。長山人。洪武實錄。六年正月甲寅。以舉人張唯。王輝。李熾。張翀。爲翰林院編修。蕭韶爲祕書監直長。繼又以王璉。張鳳。任敬。馬亮。陳敏。俱爲編修。是時天下舉人至京。太祖欲造就其才。擇其年少俊異者。皆擢編修。賜冠帶衣服。令入禁中文華堂肄業。詔太子贊善大夫宋濂等。爲之師。濂集有王宗器字辭云。王生璉。字宗器。其先太原人。今家濟南之長山。洪武五年。以易經舉進士山東。名列第三。既上南宮。未試。皇上召見便殿。親命題賦詩。詩成稱旨。擢史館編修。入文華堂肄業。詔翰林老臣爲師。近又使璉攝御史。廉察河南。歸奏對稱旨。錢牧齋列朝詩集。新汝器詩。誤援宗器事。敘入仕履云。洪武壬子。以會試舉子。簡授編修。肄業文華堂。後爲吏部主事。蓋不知山東別有一王璉。牽合爲一。跡駭可

啊。又黃瑜雙槐歲抄敘文華堂肄業事云。水東日記。以王理爲姑蘇人。蓋誤。則誤又不自牧齋始矣。宗器有醉學士歌。余已錄附張唯詩後。

春日過溪山訪良夫先生

伊余褻世用。野性遂成疾。欲追故人蹤。忘此山水癖。茲晨屬休暢。曳杖窮閱歷。悵息嘉樹林。逍遙美泉石。洞庭縱矚覽。鄧尉屢攀陟。平湖汎晴波。青苔印行迹。靈霄曠清溪。煙霞閉幽寂。愛茲風日佳。樂與禽鳥得。宛彼二三友。獲此竟晨夕。興盡復言旋。賦詩寫良覲。

近過山中耕漁軒得相款曲登覽之餘兼辱庖廚之擾言笑啓沃深慰夙昔歸坐茅屋唯有馳戀而已輒賦五言奉寄

佳會良不易。清遊踐前期。留連閱信宿。登眺自無時。山川有餘覽。風物良足娛。感子情誼篤。具饌揚清卮。高軒過疏雨。水木澹晴輝。列坐盡羣彥。言笑一解頤。心目共開豁。神思亦忘疲。歸來青山下。相望如渴饑。宴坐白雲裏。與世終永辭。

徐裕一首

裕字用貴。上虞人。洪武中高羅巡檢。

武陵泛舟

移棹武陵路。桃花澗水分。人家春島樹。樵唱暮山雲。沙渚飛鷗鳥。溪田過鹿羣。到來機事息。不道世紛紛。

徐禮一首

禮字用和。上虞人。洪武中孟縣主簿。遷縣丞。

渡荆門望楚

亂峰前路迴。旅況正紛紛。落日荆門望。青天楚國分。荒城迷郢樹。孤棹入蠻雲。誰念天涯客。西風見雁羣。

陳山一首

山字伯高。上虞人。洪武中瓊山知縣。

竹枝詞

桃葉扇寫竹枝歌。搖曳清江照翠娥。夾岸芙蓉秋水闊。薄暮雲生愁思多。

明詩紀事卷十六

甲籤

藍仁十六首

仁字靜之。崇安人。明初徙濠。尋放還。有藍山集六卷。

杭世駿榕陰詩話。二藍集。閩人無知者。何氏閩書。藍仁有藍山集。藍智有藍澗集。竹垞嘗輯入詩綜。以爲十子之先。閩中詩派。實其昆友倡之。集本合刻。吳明經焯。嘗於吳門買得藍山集。是洪武時刊。有蔣易。張架。二序。與竹垞言脗合。而藍澗集究不可購。徐惟和輯晉安風雅時。二藍闕焉。則此集之亡久矣。

陸心源儀顧堂題跋。藍山詩集六卷。明藍仁撰。前有正統二年丁巳秋八月朔。嘉議大夫。禮部左侍郎陳璠序。洪武庚辰歲花辰日。武夷文學。西江吉水倪伯文序。雲松樵者張架序。橋山真逸蔣易序。計詩六百八十餘首。藍澗詩集六卷。明藍智撰。題曰。友生程嗣祖奇遠編。集前有至正壬寅冬。戊子進士。戶部尙書。四夏張昶序。張架題。蔣易序。計詩五百餘首。案兩集。明正統以後。無重刻本。故流傳甚少。乾隆中開四庫館。亦無人進呈。館臣從永樂大典抄出。著於錄。藍山集得詩五百餘首。藍澗集得詩三百五十首。此從明刻原本抄出。藍山集多得詩一百五十餘首。藍澗集多得詩一百五十餘首。較大典本約增三分之一。近聞中郭兼秋主事。重刻二集。不言所據爲何本。前無原序。核其詩與提要著錄之數相符。當卽大典傳抄本也。藍山集誤收藍澗詩五十餘首。藍澗集誤收藍山詩三十餘首。永樂大典本。往往有此。此非館臣之誤。乃永樂大典纂修諸臣草率之故。

田按竹垞稱藍山藍澗二集。選家誤有參錯。今依明初雕本刊正。而陸氏儀顧堂題跋。所謂郭氏新刻藍山集。誤收藍澗詩五十餘首者。中如秋山懷友。擬贊士。宿田家。望武夷山。宿橋山田家。懷蔣先生。暮宿田家。正月十四日。西山感興。風雨不已。簡我同志。暮秋懷鄭居貞。西山暮歸。暮歸山中。雲峯秋霽圖。高彥敬畫。楚江春曉圖。贈魏士達諸詩。竹垞詩綜。均錄作藍山詩。正與郭氏本一一相合。大抵郭氏所據之四庫本。與竹垞所見之本相同。陸氏所得之本。又與竹垞所謂選家誤有參錯之本相同。各據所見。紛如聚訟。今亦不能定爲誰是誰非也。惟陸氏本藍山集。多有倪文伯序。藍澗集多有張昶序。又二集詩各多至百五十餘首。此亦足廣異聞耳。藍山骨格老蒼。藍澗音節高亮。二人才力各不相下。余錄明人之兄弟稱詩者。當以二藍爲開先矣。

余復嬰近以方壺所寫大王峯轉惠暇日展玩殊有幽趣因題長句

方壺畫山世有名。生紙一幅塗縱橫。孤峯倚天旭日上。危石拔地秋風生。壯遊曾來拾瑤草。夢裏武夷青未了。紫陽五曲石門荒。金老三間茅屋小。興來放筆起層巒。萬仞嵯峨咫尺間。龍洞雲煙含宿雨。鶴壇星月滿空山。武林道士余三一。來謁松根講周易。十年不出鬢垂絲。九轉將成眼如漆。新圖千里寄神交。東南一柱青天高。願授神方服石髓。共聽仙樂鳴雲璈。閒窗持贈深有意。念我衰年住汚世。便欲呼兒挽鹿車。從此相隨入蒼翠。

寄張雲松

關塞風塵暗。山林出處難。生涯謀釣艇。世事笑儒冠。有酒判長醉。無衣度苦寒。南山有奇士。扣角夜漫漫。

題吳德陽山水小影

雲山分遠近。水石助清幽。老眼看名畫。深懷似故邱。草迷行鶴徑。藤引釣魚舟。賣藥忘機者。無人識百休。

病中

臥病秋將盡。艱難日又增。夜深方著枕。戶遠更留燈。鄰畏呻吟近。僮來抑按能。有身應有患。空寂未如僧。

代毛生答

浮世容身狹。韶光過眼非。瓦盆盛社酒。櫛葉製秋衣。禮節休拘束。漁樵乞放歸。前林逐麋鹿。未與素心違。

九日西莊懷弟

衰年無力遠登臨。短杖扶持叩竹扃。雨過林間雙澗碧。雲消天際一峯青。黃花寂寞憎詩瘦。白髮淒涼畏酒醒。心把茱萸思骨肉。雁聲孤起夕陽汀。

雪中偶成

背郭茅堂早閉門。天寒獨戀繻袍溫。琴書散漫無賓客。稼穡艱難有子孫。竹杖稍能扶病力。梅花強欲惱吟魂。蹇驢踏雪如堪借。行盡溪南數里村。

春日憶章屯故居

衰年長愧北山靈。春日題詩憶翠屏。茅屋也從人借住。柴門不爲客來扃。林陰嵐溼藏書架。爐冷苔侵煮

茗瓶。惆悵閒窗巾幌在。孤墳宿草已青。

題西山菴

空山寂寞守巖扃。獨鶴棲棲傍草亭。曉鏡又催霜雪白。秋衣不換芰荷青。仙人住處多栽藥。野老來時或負苓。同氣雕殘衰朽在。百年光景似晨星。

送貢祕書入京

滄海樓船衛百靈。祕書領旨赴朝廷。近開東觀延卿月。舊入南閩識使星。一代文章推大手。百年禮樂抱遺經。蓬萊不許凡人到。空想蔡光夜夜青。

次雲松長山道中

人煙蕭索石田荒。茅屋低斜倚礪岡。雪裏送租衝虎過。雨中乏食學蠶殭。三丁編戶衣裝急。百畝沿村土木忙。懶共老農談世事。自搔短髮對斜陽。

賦網巾

白頭難掩雪霜蹤。織手穿成絡索同。映帶暮年微鬢鑠。遮藏秋色久鬚鬆。牽絲祇訝蛛臨戶。覽鏡翻愁鶴在籠。便與黃花相見好。不愁破帽落西風。

解志居詩話。網巾之制。相傳明孝陵徵行。見之於神樂觀。遂取其式。頒行天下。冠禮如此。以爲成人。三百年未之改。然歷詠者。

寬獨藍靜之有三詩。予錄其一焉。其二詩。謝劉鬪室見惠而作。一云。故人於我最相親。分惠青絲作網巾。鏡裏形容加束縛。眼中網目細條陳。少遮白髮安垂老。轉觀烏紗障俗塵。更與籬冠絮杖稱。世間還有葛天民。一云。故人念我鬢毛疏。結網裁巾寄敵廬。白雪盈簪收已盡。烏紗著紙畫難如。門臨寒水頻看鏡。籬掩秋蓬又用梳。昨日客來應怪問。衰年欲變少年餘。

宗室恆仁月山詩話。朱竹垞云。網巾之制。相傳明孝陵微行見之云云。獨藍靜之有詩。余觀謝宗可咏物詩。有賦網巾云。飾影細分雲縷滑。棋文斜界雪絲乾。蓋元時已有之矣。

寄明之弟

秋風長作客。南望一沾巾。茅屋生春草。歸來相對貧。

古木蒼藤圖

風雲氣質雪霜蹤。獨立空山慘淡中。慚愧藤蘿爭附託。年年春色換青紅。

和雲松雪中二首

夜雪茅簷積漸高。傍林時聽折危梢。南山石上雙松樹。莫更動搖仙鶴巢。
亂來雙鬢俱成雪。對雪疑窺鏡裏顏。明日春風消釋盡。祇留鬢影對青山。

藍智三十八首

智字明之。仁弟。洪武中。用薦授廣西按察僉事。有藍澗集六卷。

四庫總目。藍智詩清新婉約。足以肩隨其兄。五言結體高雅。翛然塵外。雖雄快不足。而倚逸有餘。七言頓挫瀏亮。亦無失唐人

短纒。

筆精武夷。藍明之名智。永樂中辟爲廣西僉憲。與兄布衣靜之齊名。詩詞俊逸。雅有唐風。嘗見其書銅雀臺瓦詩。於建陽友人處。可泣鬼神。詩云。曹瞞騁志吞劉社。銅雀臺高瞰中夏。徒知扼腕有臥龍。豈料垂涎已司馬。萬里河山尙出師。九原魂魄歸何時。清秋風雨滿陵樹。落日笙歌空繖帷。翠蛾紅袖恩情絕。廢塚荒臺狐兔穴。空餘片瓦落人間。千載奸雄磨未滅。明三十家詩選。明之五律。老成鏘鍊。卓然長城。殆駭駭欲度哲兄前矣。

田按藍澗集四庫錄本。僅三百餘首。余所得藍氏刻本。多百餘首。前有張昶序。與陸氏儀顧堂本同。昶序云。崇安藍明之長於詩。古彷彿魏晉。律似盛唐。長句豪健。五言溫雅。昶作序。在至正壬寅。當元時。已名重如此。明之集中。有贈張尙書四十韻。卽贈昶也。藍澗佳什。琳瑯滿目。詩綜所錄寥寥。特備錄之。以補其缺。杭堇浦謂二藍集。閩人無知者。殊不然。曹石倉明興詩選。錄二藍詩。至二卷。蓋曾見全集者。明之爲廣西僉憲。在洪武十年。徐氏筆精。謂永樂中辟爲僉憲。誤矣。

沈懷

煩憂不自整。出門欲何之。遙登西北邱。悵望滄海涯。興隨積水極。心與浮雲馳。喬不無留葉。流光去如遺。昔感倉庚鳴。今聆蟋蟀悲。諒非金石軀。齒髮日夜衰。斗酒呼良朋。爲樂當及時。聖賢不得志。空言竟無施。徒有千載名。寂寞何所知。

飲酒

鳳凰翔千仞。鷓鴣巢一枝。達士志常高。鄙夫懷其卑。富貴雖所願。貧賤亦所宜。聖賢有中道。千載誰與期。采采東籬菊。曄曄南山芝。我酒日已熟。我杯時一持。醉來望白雲。朗詠貧士詩。

廢井

靈源洩陰岑。古甃涵清樾。波濤逗海眼。疏鑿當山骨。陰凝龍蛇氣。冷浸鼃鼃窟。餘潤滋稻梁。清涼颯毛髮。豈知陵谷移。泉源有壅遏。非無涓滴流。竟爲泥沙汨。莓苔空青青。鼃黽日相聒。輓轡臥枯洞。迴首腸內熱。況當朱鳥中。炎風敲旱魃。我圃就焦枯。嘉蔬幾生活。憑軒望雲雨。神物竟寥闊。安得神禹功。於焉引溟渤。當令顛涯人。自此無饑渴。

題黃道士仙巖茅屋圖

仙巖正窈窕。茅屋何蕭爽。道人日暮歸。瑤草春來長。雲氣自舒卷。鳥鳴時下上。渺渺武夷君。千峯入遐想。

廬山

何年李謫仙。讀書石床下。雲巢雙青松。秋色正瀟灑。時登五老峯。獨酌壺中春。舉杯問淵明。誰是羲皇人。鸞鳳望赤霄。蛟龍臥空谷。蒼崖漱飛泉。欬唾成珠玉。顛倒雲錦袍。酣歌漫揮毫。文光一萬丈。更比廬山高。一落五湖上。秋風怨華髮。千古不歸來。長庚夜如月。

暮經零陵望愚溪懷柳司馬

湘川入零陵。百里盡崖石。野曠生夕陰。山空澹秋色。緬懷柳河東。微宦曾遠謫。才名一代雄。文藻萬人傑。朝游愚溪水。暮返愚溪宅。當時嘯歌地。千古仰遺迹。草木含清芬。山川曜潛德。鼓枻下中流。江清月華白。

忻城公館

清暉抱迴洲。密竹何瀟灑。雖有公館名。頗類村居者。茅屋三四家。寂寞無車馬。縣官坐堂上。猿人立堂下。風俗自強獷。衣冠真鄙野。俾之知逆順。責在任民社。慎勿示姑息。善政資陶冶。疊嶂不易青。臨風獨悲咤。

舟中望長洲田家

積流會澄川。浮沙互長洲。上有嘉樹林。下有良田疇。漁樵自成村。桑麻翳榛邱。犬吠林巷深。鳥鳴田舍幽。落日負耒歸。涼飈蕩輕舟。斯人亦何者。樂哉以優游。羈懷迫道路。悵望徒淹留。

送閩縣史邱子脩回三山

我昔南遊訪蓬島。越王城郭生芳草。釣龍臺下晚潮空。道山亭上秋風早。朱樓綺戶歌太平。邊塵不驚河水清。祇將六籍論經濟。何用萬里求功名。豈信流光不相待。風景未殊人事改。羞將藥裹對青山。獨向雲林望滄海。浮邱之子黃鶴姿。羽人曾作滄海期。醉持瑤草渡弱水。笑接白雲來武夷。昨朝別我三山去。卻憶當年舊遊處。世事悠悠西浦波。愁心歷歷洪塘樹。人生行樂在青春。出門四顧多煙塵。少年裘馬誇意氣。自古文章難致身。山川蕭瑟年華晚。季子貂裘雪霜滿。扁舟何處夢相思。日落江空雁聲遠。

相逢行贈徐剛中之建甯兼柬黃彥美總帥

去年逢君紫霞洲。今日逢君滄海頭。逢君處處好顏色。歎我年年長作客。被褐昂藏七尺軀。蟠胸磊落五

車書姑蘇臺北曾走馬。越王城南還釣魚。看花夢想揚州遠。采藥歸來杏林晚。堂上慈親鶴髮長。塔前幼女鶉衣短。見君雖貧不解愁。結交盡是豪俠流。侯門咫尺恥千謁。客路尋常歌遠遊。我亦扁舟滯江浦。握手相看總羈旅。千年龍劍蝕塵泥。三月鶯花老風雨。明日洪塘又送君。離亭詩思正紛紛。黃壚有酒莫漫醉。待余同擬梅仙雲。

丹崖歌崖在大花灘之上西去零陵五十里望之若雲錦然

斷崖千尺雲錦懸。芙蓉薜荔搖空煙。珊瑚鐵網相鉤連。赤豹下搏蒼龍淵。旁有石穴疑可穿。洞門深鎖朱陵天。我欲徑入求神仙。丹光出林夜赫然。紅葉如雨墮我前。青鳥飛去何時還。我方持節西南偏。石壁有路無由緣。赤松黃石書可傳。桃花一笑三千年。

老君洞

混沌始鑿開玉融。瑤臺隱映青芙蓉。下有洞穴如崆峒。玉樓十二高玲瓏。丹崖紫氣浮空濛。何年玄元降其中。伐毛洗髓遊太空。遺形歲久金石同。元精變化不可窮。龐眉皓首成老翁。玉局儼坐神霄宮。獅子前導。猿後從。幡幢飄飄羽蓋重。海月照見香爐峯。寶劍倒挂蒼精龍。石梁懸瀑聲淙淙。我來飛雪當嚴冬。瑤草凝碧桃花紅。花開一笑雙玉童。授以錦書石髓封。道言五千方擊蒙。窈兮冥兮道之宗。無爲自然成汝功。谷神玄牝翁以通。壽命天地相始終。吁嗟小臣等蟻蠊。上帝有敕按疲癯。萬里馳驅雙鬢蓬。人間歲月

苦匆匆。投簪未暇。巢雲松。白鶴飛去天南東。長歌林谷來清風。

春日憶延平舊遊寄嚴漢材

疎雨溪南寺。青春劍外天。維舟思別日。覽鏡惜流年。羈旅今何適。微官亦可憐。乾坤一杯酒。出處共茫然。

藍澗草堂

翠微春雨潤。虛白野堂清。道士留丹訣。鄰僧問藥名。龍歸時化劍。鶴過夜聞笙。亦是忘機者。真堪托此生。

聞藍山兄寓滁州

番水初傳信。滁山想定居。秋吟兼蟋蟀。晚飯得鱸魚。落月滄江闊。涼風白髮疏。兵戈關塞隔。不敢問何如。

山中漫題

讀書期有用。閉戶恥無能。落葉空山雨。疏鐘獨夜燈。人稱樗里子。住近石門僧。靜坐觀詩妙。須參最上乘。

秋日遊石堂奉呈盧僉憲

荒郊通徑僻。野竹閉門深。白日羲皇世。青山綺皓心。潛蛟多在壑。宿鳥獨歸林。知爾荷鋤倦。時爲梁甫吟。

雪後舟泊武夷

泊舟青嶂下。回首翠微間。殘雪孤村樹。歸雲何處山。石門無犬吠。松徑有僧還。書劍嗟漂泊。山林未得閒。

建溪

建溪三百里。勢若建瓴奔。石觸波濤惡。山連霧雨昏。蛟龍餘舊窟。豺虎但空村。行路難如此。生涯未敢論。
懷川晚立

清川繞縣衙。小立共汀沙。暝色催歸鳥。春愁對落花。江湖頻戀闕。風雨更思家。出處成何事。惟添兩鬢華。
恭城縣

十室黃茅邑。千峯紅葉村。喧卑蠻俗異。質樸古風存。雞犬連獠洞。牛羊到縣門。殘年歷荒徼。遙布聖明恩。
晚立懷友

野曠行人絕。林空墮葉聞。客愁當落日。詩思入寒雲。草暗防蛇毒。山昏過虎羣。梅花萬里道。歲晚正思君。
旅寓

旅寓真如此。空堂思悄然。秋聲一葉下。暝色數峯連。涉世方知命。清心已悟禪。鏡中窺短髮。蕭颯感流年。
柳城縣

青山入縣庭。小邑但荒城。竹覆茅茨冷。江涵石壁清。草蟲當戶墮。水鳥上塔行。問俗知無事。松風一舸輕。
賓州九日作

三年頻客路。九日又賓州。野圃黃花晚。空江白雁秋。無錢從止酒。有賦倦登樓。迴首關山遠。蕭蕭落葉愁。
幔亭峯

兩崖離立陰陰然。上有喬木高參天。仙家樓臺雞犬靜。石潭雲霧蛟龍眠。漁人樵子時相見。水鳥山花亦可憐。九曲棹歌誰和得。千年遺響墮蒼煙。

病中作

茅屋黃花共寂寥。病容詩思總無聊。山童夜靜分松火。道士天寒送藥苗。落木荒陂秋澹澹。鳴雞空館雨蕭蕭。仙家瑤草年年長。弱水蓬萊路更遙。

泊舟九江

今日泊船九江口。昨日泊船彭郎磯。木葉風高雁初下。蓼花水生魚正肥。荒城隔浦晴吹角。明月誰家夜搗衣。南望故園秋色晚。青山有意待人歸。

九月八日巴河阻風答孟原僉憲

江湖萬里喜同遊。漫向巴河滯客舟。茅屋誰家還白酒。菊花明日又黃州。故園風雨生秋夢。上國雲山入暮愁。賴有故人相慰藉。燈前談笑亦風流。

封陽驛

官船早發渡頭沙。迴首東風日又斜。千里雲山橫桂嶺。一江春水漲桃花。荒村雞犬臨欹岸。細雨鳧鷖傍釣槎。南望蒼梧煙樹晚。鳳詔何處弔重華。

宿開建江上懷閩中故人

東風嫋嫋泛鷗波。倚棹汀洲近薜蘿。江上流鶯疏雨歇。天涯芳草落花多。暮雲尙隔蒼梧野。秋興空懷白紵歌。離別不堪頻悵望。美人南國意如何。

夜坐憶西山草堂寄彭山人

憶共幽人住石門。茅屋日高嘯鳥聞。山氣溼衣涼似雨。松花吹簾輕作雲。諸生載酒問寄字。野老杖藜談隱文。丹砂無成頭又白。空對青燈愁夜分。

寄衡山李中卿

謫仙歸去臥松巢。江上飛花送錦袍。細寫山川成史記。更吟蘭杜入離騷。洞庭萬頃秋風早。衡岳千峯夜月高。欲托瑤琴寄相憶。海天清露鶴鳴皋。

田按中卿名戀。未陽人。與修元史。史不詳其事蹟。余詳考見貝清江詩後。

黃陵廟

虞帝南巡日。英皇北望時。翠華春不返。碧草暮相思。萬里重湖水。空山二女祠。沈珠真自惜。埋玉竟誰知。斑竹流雙淚。蒼梧隔九疑。天涯龍馭遠。鏡裏鳳情悲。巫雨淒殘夢。湘秋靄暝姿。渚芳迎雜佩。波影動靈旗。慘淡思韶舞。淒涼詠楚辭。空餘清夜瑟。幽怨托哀絲。

題湖山秋意圖

白水青山澹澹秋。晚涼同醉木蘭舟。西風無限江南意。楊柳芙蓉不解愁。

桂林見梅二首

忽見羅浮萬鶴羣。水邊林下玉繽紛。嶺南自古無霜雪。喜有寒香壓瘴雲。
清池老樹落花稀。雪滿山巖獨鶴歸。十二樓臺天似水。空香散作白雲飛。

懷山中

久別山中鸞鶴羣。清齋自禮武夷君。滄江明月扁舟夜。渾似松窗臥白雲。

王沂四首

沂字子與。泰和人。洪武初。徵爲諸王說書。授福建鹽運司副使。以老辭歸。有徵君集八卷。

田按明初兄弟稱詩者。二藍外。繆氏壘。龐氏二妙。錢氏三華。一家風雅。殊堪競爽。壘篋集。平陽繆仲琳仲宙所作也。蘇平仲爲之序。惜今不傳。子與與弟子啓詩。合爲二妙集。門人蕭壘所輯。子與洪武初。應詔爲諸王說書。授福建鹽運司副使。以老辭歸。劉子高有詩送之云。萬里金門詔說書。一官不拜賦歸歟。極知聖主恩榮重。自信儒生計策疏。三月鶯花辭上國。十年水竹愛閒居。眼看逸翮翔寥廓。慚愧驚駘駕鼓車。子與高不仕之節。子啓以教官徵爲御史。殆如藍山隱而藍澗仕也。集名徵君集。一名竹亭遺稿。竹亭子與別號也。

過三顧山

白下水南峙。青山多好峯。曾攜玉柱杖。細看金芙蓉。松杉百尺圍。藤蘿千萬疊。爾非盧度仙。精神乃相接。倏然巖谷底。彷彿元圃邱。履我舊行迹。何殊梁家遊。松風落松花。片片勿輕掃。更欲三顧棲。同君采薇草。

謁蘇雲卿祠

古道風沙際。荒祠草樹閒。崇文今日盛。辟世幾時還。薄宦真餘事。虛言頗厚顏。翻思徐孺子。清節照湖山。

度三花嶺

絕壁三千丈。荒煙八九家。黃茅青草瘴。黑質白章蛇。橄欖高懸子。芭蕉倒吐花。嶺南一迴首。何處是京華。

送謝子良驛丞之京

水驛論交舊。著名春城分袂若爲情。空羣奇驥長千里。惜別流鶯更一聲。白下雨收梅子熟。清江風過柳花輕。歸船暫泊應回首。五色雲中是玉京。

王佑二首

佑字子啓。沂弟。洪武初以教官舉。授監察御史。出爲廣西按察僉事。改知崇慶州。謫和州。赦歸。有長江稿五卷。

田按子啓與劉子高交分不淺。家住龍灣。有南園。擅水竹之勝。子高爲作南園灌隱說。又有過王氏南園看竹詩云。禁得南園菊。新成數百竿。何年通一徑。長有客來看。坐子啓竹林詩云。愛爾幽棲處。門前青竹林。石床三伏冷。池水一春深。陪處管勾幼。

悅坐王子啓南園竹林詩云。王子宅前千箇竹。拂簷當戶總蕭蕭。土垣近出青相映。池水下通寒不凋。上客頻留蒼玉佩。佳人時度紫瓊簫。重尋載酒題詩處。記取龍灣第二橋。子啓出知崇慶州。子高懷王太守詩云。二十年來南浦客。八千里外錦城仙。水邊送別秋風冷。馬上懷人夜月圓。載酒渡江憐往日。聽援出峽定何年。只今飄泊桑乾曲。西望酣歌一罔然。其謫和州放還也。子高有大赦後一日。聞王太守自屯所攜兒南歸詩云。故人舊謫和陽戍。五月初聞罷種田。誰使南山歌石爛。天教合浦得珠還。子啓生平事蹟。皆可於子高詩。一一見之。竹垞詩話。引子啓獄中述懷詩。知其牧崇慶獲罪之由。尙未知謫和州屯所一節也。因檢槎翁集補錄於此。

自城陵遣阮庚上桂林侯姪伯貞挈家入蜀

念爾何時見。相離七月餘。如何千里道。不寄一行書。老恐妻孥隔。貧憐骨肉疏。錦城宜早到。詞賦話相如。

贈別裴伯升

清江科第舊名家。千里初乘出使槎。離別可憐芳草色。淹留又過刺桐花。香爐煙底晨趨珮。畫角聲中晚散衙。歸到柏司煩問訊。相思雲樹隔天涯。

錢子正一首

子正名蒙。以字行。無錫人。洪武初知韓城縣。有綠苔軒集六卷。

田按錢氏三華集。子正及弟子義。族子仲益詩也。子正子義名見徐子元詩談。而不及仲益。詩綜錄仲益詩。謂得之秦對巖。顧氏梁溪詩抄。亦稱得自殿中九繩孫手書本。蓋三錢詩。始各單行。故所見互有不同。三華集爲兩淮鹽政探進四庫本。正統中。錢公善等合刻也。提要稱子正子義出處始末均無可考。梁溪詩抄謂子正名蒙。以字行。洪武辛亥進士。官韓城知縣。余考洪

武辛亥題名錄。無子正名。則顧氏所考亦未確矣。姑從闕如。以俟知者。仲益詩。別錄入永樂朝。

贈張伯庭

隱士松間已化仙。茯苓此日大於拳。青年有子傳先業。白髮逢人說後天。潦倒自知臨暮景。行藏猶待卜流年。幾時去訪搗機石。擬向成都住一廛。

錢子義一首

子義子正弟。有種菊菴集四卷。

宮怨

夜永長門靜。愁多欲斷腸。開簾拜新月。歌吹在昭陽。

陳約一首

約字博文。嘉興人。洪武中。官大理寺卿。出爲山西布政使。有一默居士集。

橋李詩繫。博文元儒竹林先生長子。與弟綱、繹、楫、倡和。楫尤有名於時。

偶成

京華二月天氣好。寒食已過清明來。畫樓珠箔燕新語。綠樹清江花亂開。

陳緝四首

緝字熙文約弟

田按熙文七律音節瀏亮有唐人標格。

送道士謝清一歸吳中

丹鼎紅光照洞庭。天壇月色帶疎星。元都道士蒼精劍。上界仙人白鳳翎。闔闔朝迴天蕩蕩。藥珠經盡晝冥冥。欲從杖屐秋山裏。風雨篝燈采茯苓。

秋夜懷明本

溪聲浙瀝起蒹葭。溪水潺湲漱白沙。大地星流還化石。小窗燈冷不成花。江淮烽火三千里。城郭民人八九家。避地欲尋張博望。月明滄海汎靈槎。

送周煥文從唐伯剛之吳興

碧瀾堂下卽吳興。十里芙蓉繞石城。山簡歸時應倒載。條侯醉後尙談兵。蘋洲雨過秋聞雁。橘里春深曉候耕。事簡好將樵唱曲。水晶宮裏坐吹笙。

弔古

投筮渡江江水空。朝馳淮海暮吳中。江東壯士輕王猛。吳下諸公失呂蒙。山鬼有靈嘯夜月。野花無主怨東風。盡將骸骨填溝壑。誰在雲臺第一功。

林公與一首

公與字學民。黃巖人。

三台詩錄。學民與兄耕民。弟齊民。俱工詩。爲潘松溪。許介石所重。耕民元季先死。學民。齊民。在明初俱不受徵聘。

田按公與一號盤所。許介石有題林盤所家藏溫日觀葡萄詩。公與與弟公存。明初尙存。元遺民也。顧俠君元詩選未錄。援明史文苑傳。趙汾。汪克寬之例。存之。

送邱慎餘還舊居

黃山兩佳士。曰容懶慎餘。如於沙礫中。見此古璠璣。妙年負奇氣。并駕四明車。縱交豪傑士。吐論雄千夫。金鞍坐駿馬。踢地紅氍毹。三千六百日。擊鼓吹笙竽。爲樂未及央。白日升太虛。翻然理歸榜。卽我泉溪居。慎餘近碧山。容懶臨通衢。軒窗相隱望。來往成歡娛。賤子幸承接。遊從連簪裾。溪風柳陰釣。山月花閒壺。相逢輒傾倒。往往忘所趨。頻年逢數奇。塵網相縈紆。兩君力徘徊。義豈魯連殊。誓言永爲好。桑梓長相於。豈知故園興。決若東潰瀦。容懶不可留。新羅尋舊廬。子又舍我去。去與容懶俱。交歡契夙好。展拓伴新圖。我懷抱離索。鬱鬱當何如。天寒歲云暮。霜月梅花初。寫言不盡意。願效蛩駘且。

林公存一首

公存字義民。公與弟。

同諸兄送慎餘

經年同里巷。一日賦歸與。素履紅塵遠。清襟玉雪虛。臨歧那忍別。得句未能書。樽酒綢繆處。舟行月上初。

林公治一首

公治字齊民。

田按公治亦公與兄弟行也。

送邱君慎餘

十載交遊處。茲辰不可留。鷓鴣知有待。猿鶴已深愁。棹發花山月。詩吟桂子秋。九峯無百里。回首思悠悠。

李毓五首

毓本姓林。字長民。黃巖人。

田按長民亦公與兄弟行也。一號藥所。許介石有題林藥所家藏子昂枯木竹石圖詩。長民詩。沖淡有陶韋意趣。

送許介石

出門送夫君。信知離別苦。窮居天一涯。浩懷誰與吐。念昔傾蓋初。開口見肝腑。誓將埽石床。共臥松蘿雨。風雲忽西來。去若黃鵠舉。幽期不果諧。玉樹何時覩。飲餞出芳郊。青陽滿寰宇。雲鴻逝冥冥。遊魚亦江渚。相思幸寄書。在遠當自樹。

臨水感懷

觸事卽成感。苦心誰復知。青春漸漸去。鬢髮生華絲。同裳豈無人。慨悵今昔非。東流向不盡。爲寄長相思。

次韻答介石秋夜見寄

山堂夜無月。所見螢燭輝。幽懷忽破碎。澹若無所依。思得同心友。攜手同車歸。誰歌綠水曲。要渺凌空飛。

答翠易子

離居感急景。羣荷念同裳。佳期渺難合。遠意孰與將。風颺石林靜。日落松筠涼。祇應羽駕來。共采瑤草芳。

題弟齊民禱雨有感卷

臥龍不肯爲時出。旱魃有意如人長。爾能呼龍起冥漠。我心得雨生清涼。池塘一夜煙草綠。江天萬頃魚波蒼。潘君志喜動新作。墨花猶帶龍涎香。

田按三台詩錄稱齊民上寒坑祈雨有應。士人爭爲歌詩。此詩亦同時作也。潘時岡喜林樞隱禱雨立應云。寒坑山倚天起。六月鑿開混沌壺。下根滄溟幾千里。六月陰風吹鬼雨。陰鷲出入雲纏纒。今年旱魃肆威怒。林君乞靈誠寔。側足元宮不自憐。風先驅兮雨隨履。頃刻如注天瓢水。郊原一覽生意新。松底流泉自相語。時岡字鶴亭。黃巖人。

董佐才一首

佐才字良用。上海人。洪武初薦辟。授洛容知縣。

田按良用與弟良史並有文譽。良史詩別見。

讀杜詩有感

幾年京國暗戈矛，淪落誰憐杜甫愁。春漏也曾噴錄事，秋饑仍復問彭州。平生忠義貧逾見，小技文章老更優。我亦此身無定處，夕陽孤倚仲宣樓。

王鈞一首

鈞字天全嘉興人。

田按天全與兄鏞有合刊詩藁，惜今不見。詩綜已錄鏞詩，余據橋李詩繫補錄天全詩一首。

水竹居爲朱克恭賦

文采風流偶晉賢，由來蹤迹托林泉。候門童子清如鶴，留客軒窗小似船。錦鯉寄將書咫尺，綵鸞飛下月嬋娟。何時把酒同燒筍，卻訪東坡笑渭川。

張輿一首

輿字行中，仁和人。洪武初上書授刑部主事，與弟輅合作聯輝集。

田汝成委巷叢談：洪武中浙江都司徐司馬，令郡城人家植冬青樹於門，數年後街市綠陰布地。張輿賦詩云：比屋冬青樹，人皆隱綺羅。春風十年後，維恐綠陰多。

約可閒老人訪王藥圃

明朝寒食風日晴。可閒欲同湖上行。先拾王壺園上翠。卻聽瑤石山頭鶯。茶鑪煩爲試新火。杏酪不須和冷錫。君若肯將花徑埽。日高相與到柴扃。

張輅一首

輅字行素。輿弟。

贈陳士甯

橫溪別業錦雲鄉。紅白蓮花薛荔牆。百事不關心。獨靜孤雲無著興。偏長佳人雪藕供微醉。童子分茶坐晚涼。如此好懷誰解寫。詩成還讓孟襄陽。

鄭杕一首

杕字叔鞞。浦江人。有學古齋集。

田按浦江鄭氏。號爲孝義家。元明兩朝。均詔旌表其門。明初有曰淵。曰滌。曰澁者。皆以行誼聞。太祖詔濂等入見。問以治家長久之道。對曰。守家法而已。太祖深嘉獎之。拜滌爲福建參議。洪武二十六年。東宮官屬久缺。命廷臣舉孝弟節行之士。廷臣以鄭氏對。太祖曰。鄭氏朕素知之。聞其里人王氏。亦倣鄭氏家法。皆可選用。以風勵天下。乃徵兩家子弟。三十以上者詣闕。既至。令自推舉。鄭氏舉濟。王氏舉勳。乃命濟爲左春坊左庶子。勳爲右春坊右庶子。二十九年。復選才閩右。曰沂者。召爲禮部尙書。其從子幹。拜御史。檇蜀府教授。杕其兄弟行。宋學士景濂女婿也。

海棠

映肉紅紗曉睡遲。一絲春色力難支。開元舊事無人記。猶有東風作畫師。

鄭枋一首

枋字叔車。

田按叔車亦枋兄弟行也。

江南曲

妾家住。在錢塘曲。門前歲歲湖波綠。垂陽十里鎖輕陰。芙蓉千柄送奇馥。翠雲帖水風颼颼。白蘋紅蓼早催秋。大姑小姑惜芳遊。見花顰眉愁復愁。移船西來泊花底。藕花染紅蘋葉紫。妾身不爲浮蘋生。頭作蓮花守紅死。

繆仲琳一首

仲琳永嘉平陽人。洪武初平陽訓導。

田按仲琳與弟仲貞。有壘篋集。蘇平仲稱其麗藻交映。逸韻迭發。鏗鏘炳煥。震耀遐邇。洪武初。兄弟皆徵至京師。官之不拜。歸而縣丞延仲琳爲訓導。縣令延仲貞爲訓導。惜壘篋集不可得。僅見仲琳一詩而已。

客夜

城頭燈影寒。鴉散聲悲咽。東歸一葉舟。夜泊松江雪。

黎慎一首

慎字充輝。以字行。清江人。

東里文集。充輝詩。清新雅則。有唐人韻致。

江西詩徵。充輝童子時。爲詩輒有奇語。長從梁石門遊。博通羣籍。落魄不羈。永樂初。應明經。召至京。授職不就歸。

田按。充輝與弟潛輝。有倡和詩。楊東里序其簡牘云。黎氏伯仲。京華倡和之什。瞻而實。婉而切。清江玉箭之閒。山川靈秀。鍾於人。挺然英傑。兄弟並起。馳聲當時。而流聞來世。如二劉三孔者。去今未遠也。將無繼之而興乎。爲名輩引重如此。充輝有清節。潛輝永樂朝進士。另詳別卷。

蒙山

飛峯起中天。凌雲疊連嶠。征驂駐其嶺。遐眺入冥漠。巖泉煙際瀉。奇石空中削。天風送黃鵠。長飛向寥廓。盤盤青天外。厚地何磅礴。丈夫四方志。天地安所托。仗劍歌遠遊。徒御總錯愕。結想陟崑崙。煙霞正綿邈。

明詩紀事卷十七

甲籤

鐺炳二十二首

炳字彥昂。以字行。鄱陽人。明初獻書言事。授中書典籤。出爲大都督府掌記。除東阿知縣。引疾歸。有春雨軒集十卷。

四庫總目。劉炳詩格。伉爽挺拔。類其爲。

詩談。江西二劉。彥昂承直。雄俊相似。

田按。明初詩家。燕京感事者。以宋仲敏壬子秋過故宮十九首爲最。劉子高早春燕城懷古六律。亦其亞也。子高詩云。金水河枯。禁苑荒。東風吹雨入宮牆。樹頭槐子乾未落。沙際草芽青已黃。北口晚陰猶有雪。薊門春早漸無霜。城樓隱映山如戟。笳鼓蕭蕭送夕陽。秋月春花不可論。關河形勝古來存。燕歸遼閣銅鸞壁。人散高門石獸蹲。牛引柴車穿柳巷。馬啣霜草出花園。由來在德非關險。不獨阿房可斷魂。海內蒼生困亂離。宮中舞女鬪腰肢。金渠水煖龍船出。彩檻花香翠輦移。松樹盤空皆偃蓋。柳條拂地更垂絲。迷樓不獨江都恨。鳥窠龍沙更可悲。彥昂燕城懷古一律。足與相抗。廣寒宮殿玉爲樓。萬歲鰲峯壓九州。番國胡僧青鼠帽。天窰宮女彩龍舟。鉤陳蒼闕山南拱。太液紅橋海北流。唯有蘆溝溝上月。年年鴻雁不勝秋。彥昂詩爲楊廉夫。宋景濂。危太樸所推重。余衡其品。於西江明初詩家。在子高之次。與新城劉子燾。正足旗鼓相當。彥昂精鑒賞。流傳古書畫。往

住有其題跋。宋景濂嘗稱之。

憶園廬

種園在東皋。草荒瓜蔓長。日落秋樹涼。褰衣獨還往。時逢野老憇。自足田園賞。沿溪暝忘歸。古寺煙鐘響。

哀周伯士

上清人

陰洞懸乳泉。石沁古苔峭。紺粉落秋江。芙蓉澹斜照。孤吟白日晚。疊嶂玄猿叫。高懷誰與儔。天風遞長嘯。

哀趙子常

晨樵歛山青。暮吸歛水綠。閉戶動一紀。守道不干祿。平生春秋傳。疑義如剖竹。哀哉青城翁。心喪三年哭。

哀方方壺

蓬萊五雲宮。金粉飾椒壁。醉時臥氍毹。酒醒灑墨汁。傲世雙眼高。鬼谷白雲溼。玉堂寄書來。落月夢相憶。野鶴弔孤松。衰螢照荒陌。

哀黃季倫

折節委榮寵。頓將生死齊。秋荷補壞衲。空林旅幽棲。懸燈禮繡佛。清齋烹露葵。虎溪流古月。自與遠公期。

哀葉楚庭

船頭酒百壺。船尾書百冊。聞騎桃花馬。醉弄西湖月。狂吟捲秋濤。聲撼扶桑折。滄海無還期。哀魂楚雲結。

哀吳用晦其祖月灣先生也

滄灣俯空寒。老月懸古色。殘花漂斷沼。野徑繞荒宅。王珣稱短簿。牙笏猶故澤。文藻遺江山。蒼茫暮煙隔。行路難

奉君五彩鳳凰之綺幄。七寶鴛鴦之錦牀。博山氤氳之水屑。金盤沆瀣之瓊漿。春風無情不相待。朱顏綠鬢年年改。姑蘇臺上鼓如雷。四時歌舞百花開。當年意氣今安在。鬼火如燈秋似海。

弔晉安將軍歌

荔枝城頭花簇簇。王孫不歸春水綠。黃金臺前煙草荒。傷心獨倚青雲哭。淚灑鑾江江倒流。楚魂暮咽楓林秋。蕉黃醕綠湘竹語。峴山石斷行人愁。信陵門下簪纓會。珠履筵前幾人在。軍中擊鼓夜不眠。珠翠成行鳴劍佩。王孫王孫真貴人。落筆龍蛇驚鬼神。千金散士馬蹏盡。鐵甲晝臥雙麒麟。桑柘陰陰連大路。野市書聲晚當戶。部曲淒涼白髮稀。甘棠猶指將軍樹。玉臆金雁漆燈殘。化鶴千年何日還。有酒誰澆趙州土。碧血化雨苔斑斑。王孫王孫不可招。仰天擊碎青桐瑤。寸心何處寫哀素。江上年年生暮潮。

漢之季

哀故御史余公闕守舒城死節而作

漢之季。洪流何湯湯。赤子爲龍蛇。蔓於漢。以淮割我城邑圖不祥。天子曰嘻。予何以奉宗廟。朝羣臣。登明堂。曰予近臣御史闕。咨爾撫師古舒國。闕以外爾制之。賜爾三百衛士斧與節。毋黷民。毋究刑。苟附而安。

文武并用禮之經。臣闕昧死頓首泣。主憂臣辱敢不力。御史騎馬來。萬姓淚落喜且悲。子我塗炭民。漢官威儀今見之。東市牽牛羊。西市羅酒漿。紛紛列道左。御史下馬相扶將。諭以天子聖且愛。明見萬里外。宵旰不遑食。兵爾饑爾苦。顛沛御史雖愚。頗知忠與慈。惟爾患難相扶持。鼓爾鼓。旗爾旗。疾則疾。徐則徐。壯者戰守。老者居。俾爾農桑毋奪食。桑青青。麥茫茫。牛羊走邱墟。御史城上行。茅屋人家開讀書。以心感人。心敵至。輒敗不敢窺。城東唬虎豹。城西嘯熊羆。斬黃攻始退。山越什什伍伍來相圍。裹瘡戰城南。吮血戰城北。大船小船捍江列。嗟城中如流魚。御史奮臂城上呼。悲風揚塵沙起。白日無先士爭死。糜無粟。士氣衰。朝食城上草。暮煮城下其。癘疫相枕何流離。御史斬愛馬。士卒不忍食。日久援不來。矢盡兵殘益危逼。梟騎死野戰。烏鳶銜肉流尸僵。孤城坐殄瘁。土山地道不可當。御史誠不德。握手謝父老。爾民多殺傷。御史登城北面拜。稱臣萬死無以報。陛下闔室竟與城俱亡。楚山蒼蒼。楚水洋洋。御史之節。功烈顯彰。天之牽璧。地之河嶽。人之綱常。千載弗渝。日月普光。誰能置廟。復立社。享爾祀。爾百世及天下。

田按思宣守安慶逾六年。小大二百餘戰。戰無不勝。糧絕城陷以死。彥壽嘗從忠宣軍事間。故能道其詳如此。余檢青陽集。附錄有劉參謀舒州謠云。大夫仗鉞來守舒。舒州城小鐵不如。城下長江限濠欄。周遭守備用百夫。賊子千城不得踰。大夫叱戰人爭趨。嚶嚶魑魅半就死。陰風吹血腥東吳。七年孤兵經百戰。白日炯炯忠義俱。我民衣食仰官給。盡力効死甯睚盱。王師不援百計疏。城中食盡官無儲。沔陽健兒肆剽殺。殺人逮盡終何辜。大夫應戰如走珠。誓國甯愛千金軀。寶刀斷折箭暗鳴。戰不持鐵至日哺。絕咽剝膚血濺髻。游魂半空罵賊奴。大夫白骨行將枯。大夫赤心死不渝。蓋亦參謀忠宣軍者。惜不詳其名也。宋

景濂作余左丞傳稱公詩文篆隸皆精緻可傳張來儀有余將軍篆書揭本歌附錄於此余將軍守舒州舒州之城大如礪長江西來繞城流賊船如雲壓城腳將軍提劍坐城頭寶劍未動賊已奔鯨鯢蔽江江爲渾孤軍六年二百戰王師不來城自存無兵猶與戰無食安可支豈無愛妾與愛馬殺之不解壯士饑力盡勢竭將奚爲倉皇齧舌屬不已義士三千同日死只今猶有盡忠池碧血清冷化爲水將軍持節東州時作此篆書形崛奇妙墨已隨神物化好事當時臨得之雖非其真意獨在垂金屈鐵蟠蛟螭我拜重是忠臣迹秦斯雖古其人非嗚呼將軍此書配者誰請君摹取涪溪石上中興碑

過南湖背

城頭開船北風起帆輕直過南湖背。上水歡呼下水嗟。龍王廟前准燒紙。小婦攀罾楊柳磯。淮鹽換得鱖魚肥。沽來新酒不成醉。臥聽鄰船歌竹枝。

題夏博士晉王羲之右軍像

上東門外胡雛嘯。萬里塵飛洛陽道。潛龍東渡晉中興。羣馬南浮國重造。石城龍從昔所都。庶事草草嗟良圖。衣冠簡傲禮樂廢。朝廷放曠君臣疏。大令平生最超卓。早年門第居臺閣。內史新除典要樞。右軍任重參帷幄。擅場翰墨出神奇。蔡衛鍾張早得之。晝長燕寢森兵衛。日煖鵝羣戲墨池。來禽青李囊盛寄。裏鮮黃庭醉後題。春風三月山陰曲。羣彥流觴映修竹。一時簪冕屬高風。百年文藻懷芳躅。流落斯文感古今。後代宸聰復購尋。小字昭陵傳玉枕。數行定武抵千金。忽見畫圖雙眼失。采采丰神驚玉立。羽扇蕭疏晚日晴。烏紗彷彿秋塵襲。繁華如夢轉頭非。典午山河幾落暉。唯有鳳凰臺上月。春風依舊紫簫吹。

瓊姬墓宋仲珩同賦

野花凝粉鈿。瓊姬醉時面。夕露柳絲長。瓊姬晚黛妝。行人墳上莫回首。一顧春風一斷腸。

田按姑蘇志。瓊姬墓。夫差女也。與夫差墓相近。高季迪。徐幼文。均有詩。附錄於此。季迪云。夢別芙蓉殿頭。墮釵雲落誰收。土昏清鏡忘曉。月冷珠襦恨秋。麋鹿昔來廢苑。牛羊今上荒邱。香魂若怨亡國。莫與西施共遊。幼文云。館娃宮裏已堪愁。况值泉臺闕小邱。月冷寶奩無復曉。池空玉雁不知秋。蘿間舊屋僧來住。竹下新亭客過遊。不有佳名留郡志。誰能識此爲停舟。

旅中除夕簡劉子憲助教張左司

麝煤凝鴨鎖虛窗。虎衛嚴城禁漏疏。鄉夢牽情千里遠。客愁隨臘一年除。酒痕釀煖春連甕。梅粉吹香晚近廚。自寫桃符燒短燭。壯懷那厭食無魚。

和九日韻寄朱見中

野樹荒臺帶晚陰。昔年歌舞憶登臨。桃花紈扇西風冷。蔓草銅甌夕露深。舊夢青雲連館閣。多情華髮老山林。江南庾信傷秋倦。疏雨簾櫳怯暮砧。

弔杞上人

重來湖上弔山僧。淚落東風憶葛藤。江海有詩傳慧可。叢林無法繼盧能。草深方丈迷春屐。塵暗袈裟掩暮燈。因憶沔陽錢太守。芭蕉亭上賦詩曾。

待渡溪澗寫懷

繁華雲物都非舊。一片寒沙臥夕陽。唯有壞垣春雨裏。野花猶似美人妝。
桃花扇底春風面。一曲吳歌一斷腸。紫陌紅塵多少夢。鬢絲贏得老劉郎。

秋詞

廣寒樓閣玉爲梁。月裏姮娥百寶粧。流水莫題紅葉句。人間天上隔宮牆。

題葉楚庭醉漁巷簡彭敬宗劉子原子載子明

落盡荼蘼草覆茵。二分流水一分塵。小車都載鵝黃酒。蘇小墳前醉過春。

暮春寫懷

晴雪飛棉柳樹斜。雨餘紫陌淨無沙。春風日日騎官馬。兩袖東風看落花。

同周伯甯連榻劇談悲歌有感

醉來拔劍倚珊瑚。嬾向侯門更曳裾。夜半聞雞眠不著。草堂秋雨讀陰符。

甘瑾十三首

瑾字彥初臨川人明初嚴州同知

國雅甘二守彥初思頗清辭如一瓢風外樹雙屐雨中山白草交河道清笳捕虜營錦衾成獨旦羅扇覺先秋亦是高唱。

列朝詩集甘瑾餘千人元末張承旨轟僑居雲錦山中與彥初及張可立甘克敬往返甚數評彥初詩如美女簪花可立如貞婦守節彥初入國朝爲嚴州同知或云翰林院待制皆未詳也或云臨川人

田按彥初詩集不傳他本所選者多五七言近體余從朱性父珊胡木難見彥初植芳堂詩題名鄙陽甘瑾作豈流寓不常錄詩者以所在題之耶明音類選光嶽英華均題作餘千人彥初律體音節高亮是錢郎一輩人

植芳堂

猗蘭被九畹佳蕙滋百疇。荃蘅與杜蒨羅生交綢繆。俊時苟不利蕪穢將誰尤。朝吾芟宿莽夕吾漑清流。翼茲枝葉茂充子雜珮酬。撫琴發清商揚舲泛中洲。美人隔南浦延佇增離憂。攬芳結續紛日暮聊夷猶。誓言寄所思川路良邈悠。恆恐年不與鷓鴣鳴先秋。陰風集中野衆芳委林邱。蘭芷變不芳藜藿漫道周。靈均去已久千載誰與儔。英英雲閒彥雅嗜取冥搜。靡蕪集遠思再感王孫遊。何所無芳草子獨良好修。願言闕英采以俟知者求。

題高伯昌遠遊卷

九月朔方城河流已涸凝。氈車馳犯雪乳椀飲兼冰。汗血宛西馬奇毛代北鷹。良材資國用翹首卽飛騰。公孫

躍馬公孫氏荆湖舊拓疆。函書鄰好絕陸戟霸圖荒。城堞迷秋草樓船散夕陽。龍文成五采終古在芒碭。

田按甘彥初躍馬公孫氏一章爲陳友諒而作也。淮張事多有以詩紀之者。友諒事不多見。余檢孔灑雲蕉館紀談。陳友諒在

江州時。嘗以春暮。結綵爲花樹。自府第夾道植至匡山。又翳繡於道上。與宮人乘肩輿而行。黃信詩云。錦繡館張春色滿。小車花下麗人行是也。黃信詩不多見。附錄於此。

龍虎沖虛張真人遊仙詩

世業神明裔。朝家禮秩優。祝釐宣室夜。賜曲鑑湖秋。海月虛瑤席。天風駟玉虬。谷神應不死。獨與化爲謀。默觀元化運。乘彼白雲歸。廣野悲張樂。青山笑拂衣。玉棺天上葬。神劍斗閒飛。圭組褒崇舊。宜看奕葉輝。

讀靖康遺事

杜鵑嘯老洛城東。烽火郊畿縱犬戎。廟略合收淝水捷。虜盟誰定渭橋功。銅駝故陌迷芳草。黃屋驚塵捲朔風。一自鼎湖龍去後。小臣何地泣遺弓。

讀史有感

汴流西繞漢時宮。陵樹蕭蕭易朔風。金盃不冰銀雁去。銅仙無露玉盤空。御溝流水人閒碧。禁苑蟠桃海上紅。卻憶晉家南渡客。清談不記誤和戎。

錢塘懷古

落木驚波入虜塵。新亭空集北來人。神州未復英雄老。王業偏安歷數屯。萬騎星屯潮捲夕。六宮雲散草生春。百年江左偷安計。泉下惟應泣老臣。

閑居感舊

待詔金門擁珮珂。南征殊賜洽謳歌。亦知江總蒙恩數。每愧揚雄識字多。頭白一官今自老。汗青千載竟誰磨。可憐夢裏鈞天曲。回首蓬萊奈爾何。

遊龍虎山

流水灣迴路百盤。化人樓閣倚清寒。枕中鴻寶長生錄。屋外元都太古壇。金鼎有丹先試犬。玉簫無曲不吹鸞。麻姑未老秋霜鬢。幾見扶桑海未乾。

寄馬彥曾

百戰孤城血未乾。故人書札報平安。秋風代馬思燕草。夜月湘歌怨漣蘭。萬里江湖仍旅食。百年天地自儒冠。山陰更有誅茅地。仗劍休辭行路難。

次張文學韻寄涂貢士

畫角城頭曲未終。十年哀怨萬方同。黍離正恨傷周切。章甫翻憐適越窮。黃葉空山僧舍雨。滄浪衰鬢釣絲風。閒愁欲遣三千斛。濁酒甯辭一百筒。

長沙夾夜泊

漠漠兼葭斷渚連。烽亭亭鼓報更傳。迴風吹樹纜初繫。斜月照篷人未眠。雁足寄書懷歲晏。蟹螯新酒及

霜前滄浪遠浦寒燈外。尙有漁郎未叩舷。

朱弘祖一首

弘祖字彥昌臨川人。洪武初以明經舉官都稅大使。有東皋耕叟詩八卷。

青溪暇筆太祖高皇帝以至正十五年乙未取安慶及太平甯國趙雙刀陷池州。余忠宣公守安慶使判官莫倫亦市鹽浙東還泊龍灣時方以兵邀之。莫倫亦自稱安慶使者。太祖聞之曰。余公元名臣使當道皆若之。天下豈有亂哉。命諸軍勿得俘掠。以禮宴勞之遣還。且曰。告余公善自爲守。又曰。老趙在池州素無仁心。恐汝去不能免也。吾以書與汝。至則以示其左右。莫倫赤至池州果爲所扼。以書示之。趙省書曰。但免汝一死耳。鹽貨不可得也。悉爲所掠。而莫倫亦遂得生還。福按余公之守安慶也。趙雙刀陳友諒引羣盜四面而攻之。太祖與之接壤未嘗加以一鏃。雖曰兵不攻堅。然神謀廟算皆由天縱。非一時英雄所能知也。其時友諒已僭大號。據有全楚。隱然一國。而太祖初提一旅之師渡江而來。若又悉力疲衆以攻堅城。不惟頓兵挫銳。然自撤屏翰身受強敵。則亦安能從容俯仰。礪兵秣馬以觀四方之釁。而出萬全之計哉。此其遠略何如也。以是而論。余公雖爲元守。實爲我用。豈非天佑國家。故使之然乎。其後友諒雖下安慶。然兵力亦自是漸衰。而勃興之朝已莫之能禦。故陳氏不旋踵而滅也。臨川朱彥昌有弔余公詩一聯云。十年血戰身無援。一旦唇亡齒亦寒。下句蓋指友諒而云耳。於此見受天命者。其所云爲固自異也。

環溪亭

一曲清江抱畫闌。八窗如在落星灣。紅塵隔斷花香外。白浪飛來鏡影閒。蝌蚪舊藏書帙淨。蜻蜓長立釣絲閒。何由動我山陰興。卻棹扁舟雪夜還。

李鎬一首

鎬字叔京臨川人。洪武初徵爲國子學正。轉翰林院編修。領中都國子監事。

田按叔京植芳堂詩顧嗣立錄入元詩選癸集而不詳其仕履。余檢蘇平仲集北麓處士李公墓誌云李鎬字叔京臨川人篤學能文。應詔至京師擢國子學正。轉翰林編修。領中都國子監事。洪武戊辰入考會試與伯衡同事。蓋叔京與平仲同考會試。因爲其父北麓求誌墓也。雙槐歲鈔云洪武戊辰會試以蘇伯衡李叔荆爲考試官。豈叔京亦以字行耶。元詩選誤作元人。曾煥江西詩徵亦沿其訛。余爲考正如此。

植芳堂詩

春陽被皋陸。時雨浹初晨。荷鋤臨前除。闢壤當荒榛。藝本日成列。培根毓奇芬。條枝及時榮。粵萼韡以分。服綵憩嘉蔭。端居離垢氛。眷茲世葉繁。德馨惟日新。興言用棄穢。庶以樂吾真。

趙迪一首

迪宜陽人。洪武中官吏部侍郎。

田按洪武時有兩趙迪。一河南宜陽人。初姓張。洪武十九年由歲貢任吏部左侍郎。見弇山堂別集。卿貳表。一福建懷安人。俞汝成明百家詩所稱鳴秋山人也。牧齋誤作一人。竹垞辨之極詳。余據弇州卿貳表佐證益明。兩存其人。一見此卷。一見二十一卷。

元夕應制

龍樓錫宴月初斜。寶炬星分照翠華。五夜歌鐘連甲第。千門燈火映皇家。錦筵人醉飄金縷。羅綺春晴散綵霞。自是宸遊多樂事。叨陪幾度賜宮花。

劉秩三首

秩字伯序。豐城人。吳元年授典籤。除檢閱。出爲武安州同。未行。改知崇明州。以誣被謫。事白棄官歸。有聽雪篷集。

列朝詩集。伯序知崇明州。奏免租課。民立祠以祀之。未幾提點鹽法。發其奸。被誣下獄。幼子孫孫年十二。詣闕訟寃。上白其事。斬誣者。竟棄官歸。事在危素獄記。

東湖女

東湖女兒髻縮鴉。清晨結伴來西家。碧羅裁衫照秋水。香酥暈臉明朝霞。儂家住在大隄曲。幾度採蓮湖上宿。江南遊客最關情。相思一夜秋波綠。

冬日卽事

縣邑干戈後。城空景寂寥。山寒雲釀雪。江晚月通潮。壯士征衫薄。將軍戰馬驕。只今邊境上。誰是霍嫖姚。

秣陵懷古

秣陵風物近如何。兵後登臨感慨多。雲淨石頭秋嶂出。月明淮口暮潮過。離人暗滴青衫淚。商女空懷玉

樹歌。忽憶舊時驄馬客。於今白髮老山阿。

陳元達一首

元達字子曉。黃巖人。洪武中知新樂縣。

紫駟馬

紫駟馬。黃金鞍。青絲絡頭。瑪瑙寒。馬上誰家年。少子錦裘繡帽。驚人看平生。鬪雞不識愁。日日長衢走紫駟。豈虞勢去如崩瓦。紫駟空棄槽櫪下。日暮驅逐如亂兵。餓向鴛鴦乞殘莖。紫駟馬。古來貴盛皆鮮終。遺棄舊物不足惜。輕薄取敗非英雄。

何明遠一首

明遠字文儀。黃巖人。明初應詔授明州市舶提舉。

寄宿旅邸

旅館藜床七尺慳。草茵零落布衾單。五更霜淨天如洗。人與梅花一樣寒。

張存一首

存字性中。丹陽人。洪武初貢生。官遂安主簿。有雪洞先生集。

練湖亭

孤亭倚太空。修篁落疏影。境靜心自閒。頓覺塵事屏。橫琴鳴冰絃。古調誰能省。顧此澹忘歸。滿山秋月冷。

諸葛伯衡一首

伯衡名阡。以字行。蘭溪人。洪武初。以薦授北平雜造局大使。終廣東參議。

墨梅

玉龍倒吸墨池乾。鱗甲驚風片片寒。喚醒羅浮仙子夢。暗香和月到闌干。

魏資政一首

資政字之覲。宣城人。洪武初。以薦授棗強丞。遷監察御史。

元妙觀

一簇煙霞擁碧峯。已知羽士躡仙蹤。客來衡嶽騎青鹿。祭罷雲壇起絳龍。座上老師能啖柏。庭中雛鶴未離松。道人自種黃精食。敲火烹香不用舂。

李純道一首

純道字思文。東陽人。明初教諭。有易簡齋、三桂齋稿。

題西巖紫霞洞

隱君獨愛西巖奇。丹厓石室相蔽虧。青松蔭地土花長。碧蘿挂月秋陰垂。每從雨後拾瑤草。時向人閒歌

紫芝遙想高風在林壑。何當躡屐相追隨。

李徵一首

徵山陽人。洪武初國子生。授考工監令。擢兵部尙書。

次若虛泛舟

月滿船窗睡起遲。鄉情詩思兩依依。山光笑我重回棹。春釀憑誰一典衣。撲面風塵偏作惡。傍人水鳥欲忘機。故園到日春還在。幾處薇花照晚扉。

錢復亨二首

復亨松江華亭人。洪武初以薦爲嶧縣教諭。詩綜作蕭山教諭有講餘集。

送黃太守

江北江南春早。山前山後暮晴。芳草渡頭客散。桃花馬上人行。

題畫

石門斜帶曉山開。楊柳陰陰護綠苔。何處畫船晴雨外。綺羅風裏載春來。

李思齊一首

思齊字齊賢。東陽人。元進士。知龍泉縣。洪武中以薦授河南按察僉事。命下卒。

題徐氏蒲石卷

獵獵石上蒲。青青迸苔碧。何人寫冰紈。清氣生几席。

